

DANIELIS ACHRELI
EPISTO-
LARUM
CONSCRIBENDARUM
FORMA
&
RATIO.



A B O Æ,

Impr. apud Joh. L. WALLIUM,
A.T. 1689.

- VIRIS
Doctrina & virtute inclitis,
DN. JOHANNI CAJANO,
Past. & Præposit. in Valdamo.
DN. JACOBO FROSTERO,
Past. & Præp. in Whle.
DN. LAURENTIO LITHOVIO,
Past. in Limmingo.
DN. OLAO LAURÆO, Rectori
Scholæ in Vjlo.
DN. JACOBO FALANDRO,
Past. in Cronby.
DN. JOHANNI LAGBEECK /
Past. in Phæstoli nuper designato.
DN. GEORGIO ÆNELIO,
Correctori in Wasa.
DN. JOHANNI FORSMAN,
Sacellano in Mocarlebn.
DN. ABRAHAMO FALANDRO,
Sacellano in Valdamo.
DN. IOHANNI ARGILLANDRO,
Sacellano in Copio.
Illis ut Fautoribus, his ut Amicis antiquis.
SALUTEM & OFFICIA.

ANxiè deliberare, quibus hoc
opusculū inscribam, & quo-
rum potissimum honori,
hanc candidi officii erigam
statuam, non est magnopere necessari-
um. Affectus vester in bonas literas, do-
ctrina solida, virtus decora, honesti &
inhonesti discriminatrix sapientia, tum
castum judicium de utili & inutili pu-
blico, altius quidem commeruere *elogi-
um*; hac tamen vice contenti esse debe-
tis, hoc *magnetico Colosso*. Magnum est
addidicisse **omnia ea**, quibus in prima
ætatula, hominem format prudens e-
ducatio, ut discriminetur à saxis, plantis,
belluis: quos labores, vos pertulisse,
notum est. Magnum est *eruditione* ac
virtute, posse obtinere sincera docto-
rum pignora, quæ in præmium dili-
gentiæ & laborum vos reportasse, no-
tum est. Magnum est, conscientia bo-
na **ambire officia**, ad quæ portanda se
ipsum quilibet idoneum judicat; quæ
etiam habetis in manu, quod notum
est. Majus est, vos reliquissim gentibus
& seculis meditanda, *pietatem, fidem, pro-
bos*

bos mores, scientiam copiosam, gravem, notabilem nam de hisce præclara judicia format ventura ætas, &, nisi vehe- menter failor, hæc quoq; præsens. At longe maximum, non intrudere se in Ovile Christi , in Pastorem animarum per inscitiae scalam, per ambitionis sitim, per avaritiæ appetitum, quod vos fecisse nunquam, oranibus notum est. Proinde non adeo mirum, si fidelis magnes sponte currat ad suum amabile ferrum. Vesta benevolentia, vester amor, vestri in ferendis judiciis, de honore Dei , de bono publico, de Ecclesiæ restauratæ vel collapsæ facie, doctrinales discursus; me sanè commo- vebant, breves basce paginas, sive testi- monia laboris sint, sive inertiae demum symbola fuerint ; tam egregiis inscri- bere nominibus. Si displicant, quovis locorum abjicite: si placent, potestis eas inspicere eo animo , quo olim sin- cerè dilexistis , vestrarum virtutum æstimatorem.

DAN. ACHRELIUM.



LECTORES BENEVOLI

Qui, sine judicio, audaces senten-
tias, de quolibet scripto, promul-
gant: Eaq[ue], que altiora sunt,
non capiunt, nec mediocria in-
telligunt, nec abdita indagare valent. Illi ple-
no spiritu clamant, EPISTOLAS, tot secu-
lis scriptas, arte carere & dignitate val-
dè exigua splendescere. Factantiam i-
stam rideat Democritus, refutent pariter,
illi, quorum otia nulla magnarum rerum
e cogitatio turbat. Ego in hac maneo sententia,
Epistolas Theologicas, Politicas, Ora-
torias, Familiares, nec inventione,
nec

nec dispositione, nec eloquio de-
centi, penitus carere; quod validis ra-
tionibus ostendit Andreas Reiherus
in suo florilegio Epistolico. Credi-
bile est margaritas nasci non posse, nisi in-
tra concharum claustra: Nec metalla, pon-
dere pura, alibi natales invenire, quam
in matrice puri sulphuris: vulgares autem
lapilli, ubique locorum in ingenti copia
proveniunt; Qui, quamvis naturam re-
rum, & ornant, & pariter juvant, illud ta-
men pretium non possunt adsequi, quod a-
lliae habent gemmarum præstantia & auri
limpidissimus nitor. Ferè eodem modo
res se babet cum Epistolis. Has sche-
dulas docti equè ac indocti promulgant,
ac super liquidam & aridam disseminant;
An omnes, pari ingenio, cura ac felicita-
te, suo defuncti sint officio? Judicent periti.
Quorum pariter extant egregia præce-

pta,

pta, e quibus per otium colligere placuit haec
monita, qvæ in usum juventutis Academi-
æ candidè emitto. Pinguis ingenia am-
bulare possunt per omne literarum genus,
per doctrinarum orbem, per vasta scientia-
rum maria; indeque onusta redire vero
sapientia succo, sale & balsamo. Ego vero,
mæ simplicitatis & paupertatis bene me-
mor, quoniam ista prudentiae copiâ plane
destituor; laborabo in hoc uno, ut juven-
tutis commodis, pro modulo mei ingenii,
fideliter inserdiam. Itaque hisce præce-
ptiunculis utantur, quibus placet bre-
vitas, quibus prolixitas tedium est; quibus
ampla commentaria adire denegavit facul-
tas domestica, paulo angustior. Ego in-
genue fateor, me in levi arguento fecisse
quod potui; faciante alii in amplioribus &
arduis, qvod demandati officii ratio ipsis
imponit, Valete. Lectores Benevoli.

No-

NOMINA STUDIOSORUM

Quorum sumptu ac industria hoc opusculum
usibus Adolescentie communicatur,
sunt ista.

1. ERICUS QVIIURG.
2. JOHANNES FORSTEEN.
3. ÆSCILLUS PETRÆUS.
4. HENRICUS BARTOLINUS.
5. THOMAS MART. ANUNG.
6. LAURENTIUS BROZENIUS.
7. JOHAN: LAURBECCHIUS.
8. CAROLUS QJEGEER.

Nomina inquam merito notanda, propter industriam, & laborem, & exemplum: **Enim** verò cum alii, nunc hoc, nunc illud somniant, vel ebrii in suis furoribus obambulant; aut, bona parentum, in ganeas & voluptates in honestas effundunt. Distinguunt **HI** tempora laboribus, exhauiunt horas molestiis, sicq; se idoneos reddunt usibus Dei, Regis, & Regni.

DAN.



DANIELIS ACHRELI

CONSCRIBENDARUM EPI-
STOLARUM COMPENDIOSA
INSTRUCTIO.

P R Æ F A T I O .

Qordatis mentibus, nequaquam mirum videri debet, si in explicanda materia longè notissima, calatum meum brevissimè exerceam. Scilicet, is est seculorum genius, compendiosa diffundere, rursus ea, quamvis diversa facie, in epitomen contrahere; curiosa vero addere & que novitatem quandam sapiunt, excellentibus tantum relictum est ingenii. Nostra simplicitas, quemadmodum hu-

A

mili-

mili mis adsvevit, ita prona mane-
bit semper inservire commodis ju-
ventutis: in cuius quoq; usus, hæc
brevia Epistolarum conscribendarum p̄cepta, ex laudatissimis Scriptoribus
collecta, publicare placuit. Cau-
sarum habeo plurimas: *Monitum Dei*,
ne defodeamus ejus munera: *Con-
scientiae calcar*; in *Adolescentiam obliga-
tio*: quam benè exposuit Virorum
doctiss: GERHARDUS VOSSIUS, in li-
bello de *cognitione sui*; ubi inter alia,
de Professoribus scientiarum, sic lo-
quitur: *Venio ad Academicos*, quos non
inseitè à doctissimis hominibus in eria vi-
deo genera dispesci: APES, FUCOS, CRA-
BRONES: APES gignunt mel fragrans,
Et tum hujus alimonia auditores pascunt,
tum odore ejus multos sagacioris naris
ad Acad: pelliciunt, precipue si aureis
ingenii doctrineq; monumentis, illustrem
sibi, pariterq; Academie, atq; adeo pa-
trie, famam pariant. Fuci, favore Ma-
gnahym

gnatum in ordinem Professorium allestii
indigni, non de honore Academiæ sollicit,
sunt: sed duntaxat de commodis, quæ ex
ea dignitate percipiunt. CRABRONES,
invidiâ lacerant præstantium collegarum
famam , ut sic ipsi quidem videantur,
quod non sunt, ac præclaræ illæ animæ,
non videantur quod sunt. Nunc qui Te
pulcro Professorum ordini insertum præ-
dicas: attende quæso, num in apibus, fu-
cis , an crabronibus nomen mercaris ?
Accedit denique, ut comicus lo-
quitur , fundi nostri calamitas: rarò
quippe ad nos, qui sub Polo habi-
tamus , apportantur rariores li-
bri ; rarius vestigantur ab ætate er-
roribus obnoxia. Enimvero illis
temporibus vivimus, quibus pro sa-
pientia inertia, pro prudentia delicate
opinio haud dubiè regnant. Cui
morbo, si aliquo oleo mederi pos-
sumus, satis ingens muneris nostri,
in hoc quoque argumento pretium

⁴
fecimus. Vestrū tantummodo
eis ô Lectissima pectora, magis af-
fектum benignum æstimare; quàm,
ex passione mera , candorem ac
labores nostros, audaci & plusquam
ridiculo stylo proscindere.

CAPUT PRIMUM.
DE EPISTOLA , QVID SIT? EJUSQUE
MULTIPLICI UTILITATE.

S. I. *Epistola est colloquium absentium cum
absente, inventum ad communican-
da consilia; ad requirenda judicia;
ad explicandum statum rerum publi-
carum; ad exprimendas cogitationes
circa privatas.*

Ab isto græcorum ἐπιστέλλειν,
qvod mittere significat, deduc-
citur vocabulum EPISTOLÆ.
Nam cum varia & grandia, fuere o-
lim & sunt quoq; hodie imperiorum
negotia, casus, motus, molimina, quæ
con-

concernunt partim regnorum salutem; partim eruditionis propagationem; partim consultationes amicorum; necessum erat HUMANÆ INDUSTRIÆ aliquot vinculum investigare; quo longè dissita conne-
cteret, remotarum rerum faciem specularetur, adeoque sermone ju-
cundo familiares adirit; quod sane aliud non est, quam EPISTOLA; olim
rudior; cum antè membranarum u-
sum in tabellis ligneis, cera obdu-
ctis, per stylum exararetur; unde illa tabularum nomina exorta. Dein-
de solemnior & castigatior svavi litera-
rum concentu, in chartarum pagi-
nis descripta; qui mos quoqvè ho-
die per terrarum orbem, ubi aliquæ civilitas viget, servatur. Cœterum,
quamvis præsentibus talia exem-
plaria tradita novimus, quemadmo-
dum Cœsar ejusmodi hortatoria de in-
stanti periculo admonebat, illa tamen
potius

potius *codicillorum* nomine quam iu-
starum *epistolarum* titulo veniunt.
Quia hi traduntur, iste mittuntur; *Hi*
relinquuntur aperti, ille ob-signantur an-
nulis: Jam vero ut *is*, juxta Mes-
salam apud *Fabium*; omnium-
que doctorum consensum, *Germa-*
nus est orator, qui de quavis ma-
teria, aptè dicere potest, pro dignitate rea-
rum, pro utilitate temporum, cum fru-
ctu & voluptate audientium: Consimi-
li modo *Epistolam* recte scribere di-
citur ille, qui judicio & gratiâ dis-
serit cum aliis; Qui errores morta-
lium castè monstrat; qui responsa
dat planissima; qui consilia porrigit
salubria; qui accuratè svadet, &
modestè callet dissvidere.

§. 2. *Unde* facile appareat, magnam esse
Epistolarum utilitatem; quam post-
quam perspexerunt seculorum eruditi,
laudabili huic studio, diligentem im-
penderant operam.

Sanè

Sanè verò, non modo per præcepta & commentarios FACULTATUM ac DISCIPLINARUM; per HISTORIAM PRAGMATICAM, per ORATIONUM cujuscunque generis prudentissimas elaborationes; per SYMBOLOCOS FIGURARUM APPARATUS; FABULARUM involucra, tum COLLOQUIORUM erudita artifia, propagantur mascula SAPIENTIA: verū etiam per EPISTOLAS sano consilio, accurata compositione, & recta ratione scriptas. Hoc modo cœlestem doctrinam indolemque articulorum fidei, Divini Apostolorum calami promulgarunt. Hoc modo multa, quæ Christianorum vitam decent docuerunt S. Patres. Hoc modo summi Theologi, Lutherus, Philippus, ambo Hunniï, pluresquè sacri Herōes ea annotarunt, & quasi concordi foedere sanciverunt, quæ, ad illustrationem

legentium, ad servandum ordinem
in Ecclesia; ad confirmandam pu-
riorem civilitatis disciplinam, ma-
gnopere faciunt. Hoc modo, plu-
rima in jure & legibus illustrarunt
Puteanus, Cunæus, Conringius,
Grotius. In medicina Hippocra-
tes, Langius: In Philosophia Sene-
ca, Symmachus, Horatius, & infi-
niti propemodum alii: Idemque in
variorum argumentorum exposi-
tione, de prudentia civili, de statu tem-
porum, de indole negotiorum; de laudibus
personarum, populorum; regionum pre-
stiterunt Cicero, Plinius, Erasmus,
Lipsius, Boxhornius, Crusius, Bau-
dius, Scaliger, Muretus, tum ille
magnus Forstnerus consimiles-
que principes Literatorum.

CAPUT SECUNDUM.

DE VARIETATE EPISTOLARUM.

§. I. Materia Epistolarum æquè latè pa-
tet, ac ipsarum orationum.

Qvid-

Quidquid est rerum Divinarum;
 quidquid sublime disputari pot-
 est circa mundi fabricam &
 virtutum seriem; quidquid negotio-
 rum in humana vita occurrit, illud
 omne scriptis ad alios literis, pot-
 est communicari. Rerum vero, cum
 quædam sint in *alto posita* atque à
 vulgi oculis ingenioque submotæ:
 Aliæ rursus *humiles* & *singulis obvia*;
 Sciendum est, prius illud epistolarum
genus, dignitate sua excellere, gran-
 di rationum vi pertentare animos,
 Dei honorem & mortalium salutem
 procurare. Posterius autem, faciliori
 gratia labi, & via magis vulgari in-
 cedere totum utpote ad docendum
 & delectandum compositum. Sed
 ut hæc planiora fiant; age! in claf-
 ses certas Epistolas partiemur,

§.2. *Dividuntur ergo, in sacras sive Theo-*
logicas: In Civiles sive Politicas: In
Pomposas sive oratorias: In privatas
sive familiares. Alii

Alii magni nominis auctores, pro Libertate sui ingenii eas dispe-
scunt, nunc in pauciora, nunc in plu-
ra genera, adduntq; *argutæ & tex-
tuales* &c: A quorum tamen men-
te nos non recedimus. Una quip-
pe est in suo throno sedens regina
mundi *veritas*; ad quam amplectan-
dam dum festinamus, perinde fue-
rit qvot gradibus in illam arcem
contendimus, modo ejus numen li-
cet osculo libare & adorare devo-
tè. Qvinimò, si *Veritatem nostris scri-
ptis contingimus*; si ejus vim, co-
ram juventute possumus pateface-
re; abundè magnum conscientiæ
fructum habemus, adeoque trium-
phamus, quod tam optatam conse-
quuti simus votorum summam.

§. 2. Epistolæ theologicæ continent consul-
tationes magnorum virorum de dogma-
tibus fidei; de illis controversis com-
ponendis, quæ turbant gloriam Dei,
veræ

vere religionis pacem & salutem animarum.

Exemplis abundant Apostolorum scripta, tum Ecclesiasticæ Historiæ monumenta, pro ut id ipsum videmus in centuriis Osiandri, ac commentariis Sleidani, rerum sub CAROLO 5. gestarum. Et quem latent Duræi, Massenii aliorumque pro concordia confilia. Ipse quoqu Slusselbergius, jam indè à Luthero ad sua tempora collegit omnium illustrium Theologorum epistolas, pro Deo, tranquillitate religionis, & æterna animarum felicitate piè, castè, graviter, tum doctissime adornatas.

§. 4. *Epistole Civiles, continent confilia Prudentium, super eanegotia, quibus sanciri solet imperiorum gloria, & honor gentium.*

Harum duplex genus invenio; unum merè publicum; Regum ad Reges;

ges; civicatum ad Civitates: de nuptiis, de fæderibus, de bello & pace; de juribus limitum, de sanctitate legatorum, consimilibusq; magnarum meditationum arcanis: Alterum mixtum ex publico & privato; fit iterum dupliciter: Vel quando privati cum personis insublimi positis, de rebus ad publicum pertinentibus consultant; quemadmodum Plinius Trajani judicium flagitat, de subjiciendis quæstioni Christianis? Cicero ad Senatum, de rebus à se gestis in Provincia: Sene-
ca ad Neronem de Clementia; Erasmus ad Principes Europæ: Grotius ad Auberium & Thuanum.
&c. vel quando privati ad privatos de publicis tamen negotiis scribunt; tales Epistolas propemodum habemus numero infinitas, nec fortè illarum finis erit, ante finem ipsius mundi.

§. 5. Epistolæ pomposæ appellantur, que pulcro

pulcro rerum contextu, & Florido ornatu verborum, scriptorum ingenia manifestant ac celebrant.

Ad hoc genus referimus insignes dedicatorias; sveltes gratulatorias; nunciatorias gloriofas; laudatorias infucatas; vituperatorias justas; svasorias moderatas; Disfavorias castas; hortatorias graves; monitorias cautas; petitorias officiosas; invitatorias ad nuptias, ad convivia, ad exequias, paulo solenniores. Commendatias cordatas, communicatorias sinceras: Adde nunc Accusatorias, objurgatorias, exprobratorias, comminatorys, expostulatorias, deprecatorias, reconciliatorias, & consimiles species. Tum consolatorias subtili digito, & præclara facundia scriptas.

§. 6. Epistole familiares dicuntur illæ, quæ amici ad amicos mittunt; In quibus quadam animi licentia ab

uno argumento in aliud ambulat, ser-
to non adeò curioso dispositionis artificio.

Ex Rhetorum præceptis con-
stat ordinem esse triplicem; *Natu-
ralem*, quando materia, quæ expli-
cari debet, non alias leges admit-
tit: Ut si qvis vitam hominis co-
natur depingere, ætatis cuiusque
gradus omnino perambulabit. Tum
Artificilem, quæ res juxta certam
normam disponit; Denique *arbitra-
rium*, non tamen planè confusum,
sed cautum & judiciosum: qvem nos
nunc maximè spectamus. *Scilicet*, in
boc literarum classe, quoddam *artificium*
desiderio, alias *indoctorum schedule*, ab
eruditorum stylo parum different. Cau-
tior tamen erit processus; sic, ut res
variæ, de quibus sermo est institu-
endus, sint Lectori gratæ, jucundæ,
amabiles; connexio nunc tecta,
nunc aperta, nunc acuta; nunc pla-
nissima. Amplificatio amœna, me-
ditatio-

ditationibus cordatis, stimulis prudenteribus, oppositione ac refutatione mellea abundans. Delitescit enim in hoc scriptionis modo, singularis quædam vis, unde politicarum Epistolarum initia, vigor & ordo pendent.

§. 7. Cum itaq; tot sint differentia epistolarum: postulat discipline ratio, ut singularum ingenia ac dotes, ubersus consideremus.

Theologicus character gravitatem amat, rejecta omni levitate. Politicus ille, cum duplex sit, publicus & publicoprivatus, ibi maiestas & auctoritas fulgent; heic seposita obscura sollicitudine, decens ornatus & civiles gemmæ nitent. Pomposus vero, cum varius sit, discrepantes haud dubie formas habet, quas felicius ex diligentí lectione atque scrutinio, quam prolixis præceptionibus addisces. Ceterum hæ enumeratae Epistolarum species,

„cies non alias *inventionis & dispositio-*
 „*nis* seqvuntur leges, quam eas, qvas
 „copiose tradunt magistri Rhetorū.
 In dedicatoriis floridi sunt Jesuitæ.
 Orthodoxi Theologi, explosa adu-
 latione, constantius loqvuntur; nec
 negligendæ scriptorum illustrium
 lucubrations Hispanorum, Italo-
 rum, Anglorum, Germanorum,
 Polonorum, Batavorum; inter quas
 eminent Vossii, Barclaii & Grotii
 Illa præmissa libris de I: B ac P. quæ
 forte sine exemplo haberi debet.
 Hæc cum dicimus, juventutem sin-
 cerè monemus, ut in scribendis de-
 dicatoriis eminentiam & gradus
 personarum considerent; *Aliud Re-*
gem, aliud senatorem, aliud Comitem,
aliud literatum, aliud concivem decet.
Unde malè faciunt, qui dissertatiunculis
dulgarib⁹, prolixiores nuncupatorias præ-
figunt, quam alias erudit⁹ præmittunt
integris maximi momenti Libris.
 Verum

Verum in istam tam ridiculam vanitatem, alia vice plenius parentabimus, nunc revertar ad alia. In *Gratulatoriis*, *Nunciatoriis*, *Laudatoriis* &c. regnant *Historici*, *Philosophi*, *Poëtæ*. In *consolatoriis* omnis eruditio & dicendi splendor triumphabit. Consule Servii ad Tullium; Senecæ ad Helviam, Polybium, Marciam; Erasmi ad Glareanum; Grotii ad Auberium, Bœccleri ad Johannem Silbersternum; aliorumq; in consimili casu labores. Profecto inter centum, vix decem invenies, qui hunc apicem sagaci ingenio tetigerunt; nisi heic aliquid perfauleris, nullam pectori faucio medelam adseres, potius eam nebeculam in chartula pinges, quam levissima quælibet aura diffibabit. Ac *FAMILIARES EPISTOLÆ*, non conformant se planè ad mandata Rhetorum; gaudent libertate vivida; non quasi

confusa heic omnia sint; ab ista tam
men sollicitudine remota, quam *ars*
requirit: neq; enim refert: an par-
tes suo dimoveantur loco? dum
modo *propositio* cum *argumentis*, &
gemmae amplificatoriis, jucundis
insinuationibus, inter se colludunt.

§. 8. Qui causarum genera respiciunt,
epistolas omnes referunt ad genus
Demonstrativum, *Deliberativum* & *ju-
ridicale*.

Benè illud quidem & eruditè;
præsertim cum inter doctiores ne-
mo sit, qui ista non dudum præ-
novit. Verum cum hodierna scri-
bendi ratio, paululum differat à
priscorum rigore, occurrantq; E-
pistolæ, quæ ista singula vel simul
commiscent, vel etiam non admit-
tunt, ut ex *argutis illis & criticis con-
stat*; idcirco talibus tricis, nolui
discentes onerare. Adde, quod cau-
sarum

sarum genera sint una cum exemplis suis, ab Eloquentiæ magistris in Rheticis scholis explicata: occur-
rantq; in illis eadem ferè articia.
Nos vero, præsupposita *Inventione*,
de *disponendis argumentis*, plenius su-
mus solliciti.

CAPUT TERTIUM.

DE MEDIIS, QIBUS CONSEQUIMUR FA- CULTATEM SCRIBENDI EPISTOLAS.

S. I. Illa hactenus enumerata quatuor
genera epistolarum, qui cum laude &
sui nominis gloriæ desiderat consigna-
re, adferre debet primò ingenium
candidum.

Mirabilis est natura, quæ cuiq;
homini certum impressit GE-
NIUM; cuius beneficio aptus
est ad obeunda, nunc hæc, nunc il-
la munia: grande Dei beneficium!
grande orbis miraculum! grande
magnarum rerum fundamentum!

unde mirari s^epius soleo, multos
exiguo intellectu pr^{ed}itos, nulla scien-
tia excultos, nullo judicio divites; ta-
men illustrium collegiis sese intrudere;
ut per totam vitam, alienis oculis vi-
deant; aliorum ore Loquantur; alieno
corde sapiant: tantum efficiunt AU-
DACIA & OCCASIO PRAVI seculi,
quæ, per magnificas bonorum
species; CANDIDÆ PRUEENTIÆ illu-
dunt. Enimvero, ut inter agro-
rum glebas, pro diversitate terra-
rum, magnam discepantiam, pul-
verulentam, sabulosam, argillaceam,
mineralem, pingvem, macram
videmus. Sic inter homines, alii
ad tractandas disciplinas sapientiæ;
alii ad exercenda opificum studia;
alii ad obeunda diversissimarum
rerum negotia inclinant. Comple-
titur amplitudo mundi multos ho-
mines, sapientes, stultos bonos, pra-
vos; mites, superbos; illistris angvine
natos,

natos, tum ex vili fece oriundos, miseria plerumq; magna dignissimos. Nam cum vident se, nec industria, nec judicio personam sustinere posse in hac humanarum rerum tam lubrica scena. Grandes nihilo secius in omnibus afferant videri, ut quondam Terentius ille Thraso. Cœlo pariter & mixtura elementorum, à cæteris mortalibus volunt secerni. Qvotquot majorum sensu & gustu sapiunt, inscitiæ & stupiditati natos autumant: Qvotquot Dei honorem, Regum dignitatem, & veram Literatorum eminentiam defendunt, sui labii ac styli dulci balstamo tentant inficere. Qvotqvot ex fundamentis prudentiæ, sciunt, præsentia, præterita, & futura posse aptè conjungere; hos inscitiæ, stupiditati, & crassæ ignorantie natos

tos clamant. Ac interea se ipsos sub-
 limes, se acutos, se solos magnifi-
 cos prædicant; disponunt actiones
 per somnia, fundunt in sermonibus
 oracula, tumentia, fastidiosa, risu
 ex æquo & execratione longè di-
 gnissima. Felicem proinde eum fo-
 re pronunciamus; cui ingenium
 contigit optimum & sincerum, quale
 in ORATORE reqvirit non contem-
 nendus noster præceptor Fabius:
Nam cum orator esse debeat VIR BO-
NUS, DICENDI PERITUS; ut verba e-
jus sonant, binc infallibili judicio con-
cludit. Neg, enim tantum id dico, eum,
qui sit orator; virum bonum esse oportet,
sed ne futurum quidem oratorum, nisi
virum bonum. Nam certe neque intel-
ligentiam concesseris eis, qui proposita
bonorum ac turpium via, pejorem se-
qui malint: neq, prudentiam iis, qui in
gravissimas freqventer legum, semper
vero male conscientia pœnas à semiti-
psis

psis improvisio rerum exitu , inducan-
 tur. Quod si neminem malum esse, ni-
 si stultum eundem, non modo à sapien-
 tibus dicitur, sed vulgo quoq; semper est
 creditum, certè non fiet unquam stultus
 orator. Tale ingenium si habet E-
 PISTOLARUM scriptor , De bonitate
 Divina amplius conqveri non pot-
 est. Ut solem illustrant radii, Ita
 magnam indolem hæc circumstant
 ac indicant. In Deum & eterna im-
 mobilis magnes: seria cogitatio humanita-
 tis & fragilitatis nostræ: Sermo modestus
 & comis : pectus mendacii & ineptia-
 rum , omniuque actionum turpium
 impatiens: veræ laudis studium: iu affli-
 ctos amor ; In aquitatem & justitiam fa-
 vor. In socordiam continua prælia. Ani-
 mus non derisor, non dixax, non vindic-
 etæ eupidus , non levis , non inquietus,
 non inverecundus. Qvoniam summa
 bonis mentis est, sensui rationem a-
 nimum corpori, eternitatem tempori, u-
 tile in-

se jucundo, Deum homini preponere.
 His donis si accedunt prompta vis
 inveniendi, copiosa dicendi ubertas,
 cum concinnum artificium exor-
 nandi orationem, non nisi elegantissi-
 mas, à tanto pectore, exspectamus
Epistolas.

*§. 2. Bonitatem ingenii comitari debet
 judicium penetrans, sive intellectus pra-
 eticus, præteritorum sciens, præsen-
 tium gnarus, futurorum intelligens.*

Mens humana Cœli contem-
 platrix, terrarum domina ! suos
 quoque habet administros, quibus
 ad peragenda negotia, in alto illo
 intelligendi munere commodissimè
 utitur. *sensus* cognoscunt rerum cor-
 porearum schemata conflictus, con-
 jugia, privilegia: *Plantasia* custodit
 imagines, quæ ipsam sæpè ingen-
 ti lusu & ridiculis ambagibus tur-
 bant. *Memoria* variarum rerum co-
 piam

piam sinu suo complectitur, eamque
 adamat, honorat, & ubi opus fuerit
 refert. *Voluntas* rabide sape se ge-
 rit, movet prælia in intellectu, phan-
 thasiam confundit, sensus jam seqvi-
 tur, jam tentat evertere, ut exem-
 pla temporum ubertim docent.
 Videmus n. homines satis indoctos,
 satis miseros, satis scabiosos; ut ma-
 gni videantur, præstantes adoriri:
 eosque ridicula subtilitate vexare.
 Tantum efficiunt *voluntas sine ratione*:
opinio sine prudentia, *furor belluinus si-*
ne ratione recta. Itaque manebit fir-
 mum & immobile, *solum judicium*,
obscuris lucem, *dissipatis ordinem*, *confu-*
sis vim, *decus & majestatem verè*
afferre: *Enimvero*, jacerent spe-
 cies rerum inter se permixtæ, nisi
 vis judicii ea ordinaret, segregra-
 ret, componeret: fulgidissima fax
 actionū humanarum, egens tamen
 æternæ mentis oleo, luce, lampada;

sine quibus malignus furor, ob-
scurum lumen, pestilens vigor, te-
rrimus odorum suffitus exha-
lant.

§. 2. Illustre ingenium & vidinum ju-
dicum, tertio loco acuit curæ & indu-
striae sanus & moderatus ardor.

Ut corporibus nostris robur
& sanitatem concillant cursus cum
velocibus, lucta cum fortissimis. Sic
mentis præstantiam illa diligentia,
quæ omnem studiorum difficulta-
tem, omnem indagandæ veritatis
molestiam, omnem acquirendæ eru-
ditionis sollicitudinem vincit, ele-
vat, confortat. Nihil tam sublime,
tam magnificem natura constitu-
it; nihil tam arduum tam salebro-
sum subtilitas ad invenit; nihil tam
profundè abdidit ac demersit. Qvod
non laboris assiduitate indagare,
eruere ac consequi licet. Moritur
ignis, si non adgesto pabulo aga-
tur

tur in flammam. Putreficit aqua nulla ventorum agitatione commota. Veneno turgent aera, non ventilata placidis aurarum flabris; Perdunt terrae feracitatem agrorum, si nemo vomere eas evertit, occat, macerat, ac vegeto semine ditat. Silet in montium criptis generatio metallorum; Si calor subterraneus *fermata salino-sulphureo-mercurialia*, non exacte coquit ac disponit. Eodem prorsus modo, obtorpescunt etiam optima ingenia, socordia deperdita, luxu truncata, lagina ebria, libidine corrupta, opinione & insciencia tumida. Tullius oratorum maximus, praeteriens aliquando aedes & amplias, & marmoreas, & aulæis cœlatas pigerrimi hominis: jocose dixit, *hic sepultus est Aufiduis!* id enim erat nomen incolæ hujus domus. Fortassis arbitrabatur, acutissimilie, Virum vino & epulis immersum

sum, aleæ & lusibus adsvetum, inter venefica scortorum agmina saltare edoctum, nec animi, nec corporis vitam vivere, magisque inter mortales, quam vivos recensendum. Ut verbo dicam quod sentiam; tolle ex societatis humanae contubernio CURAM & INDUSTRIAM, videbis, eodem puncto omnia in exitium ruere, regnum gloriam cadere, regum majestatem turbari, salutem subditorum everti; non satiando ventri, non defendendæ societati, non ampliandæ menti, non tuendo cætui mortalium, ullum amplius supereesse modum, mensuram, muros, auspicia.

§. 4. Curam istam ac industriam alit, vegetat, confortat, lectionis vigor, & delectus scriptorum.

Singulare subsidium & promptuarium certum earum rerum, quæ Epistolicam quoque ingreduntur

tur meditationem. Ut in Erudi-
tione alia, basin solidæ sapientiæ
figurant LECTIO OPTIMORUM SCRIP-
TORUM, artium mater, doctrinarum
magistra, ingeniorum eos, manus pru-
dentie, spiritus societatis civilis, scientia-
rum omnium possessio admirabilis: Sic &
exinde levamen & adjumentū habet
Epistola. Quidquid Dei digitus per
Prophetas & Apostolos exara-
vit; quidquid annotavit candida
vetustas; quidquid hujus seculi do-
cti viri docuerunt; quidquid ter-
rarum & gentium uspiam inveni-
tur ingenio castum, industria acu-
tum, cognitione fructuosum, illud
omne per *Epistolam* explicari po-
test. Acumen rationis; orationis
prosæ ac ligatæ celebritas; Virtu-
tum clarissimæ tabulæ; Prudentiæ
civilis dignitas, ac notitia imperi-
orum; mundi gratia, globorum di-
spositio; lucium & umbrarum mi-
racu-

racula, omniumque rerum ideæ ac
 magnes. Circuli mathematicorum
 & lineæ ; quibus decircinant Ter-
 ras, tractus maris, cœlumq; profun-
 dum. Tum illa valetudinis curan-
 dæ ratio; illa legum scientia; Illa
 Historiarum amplitudo, per Lectio-
 nem innotescit, ac *Epistolarum* bene-
 ficio etiam optimè explicari potest.
 Tanta sanè est librorum virtus !
 tantæ utilitates! ut animum huma-
 num, mortaliū & vulgi sordibus
 ereptum , ad contubernia cœlitum
 elevent , præstantissimis scientiis
 imbuant, omnique jucunditate im-
 pleant ac beent. Quid namque a-
 liud sunt magnorum virorum scri-
 pta, quam *testamenta eternitatis*, inge-
 niorum symbola, *thesauri sapientie*, vo-
 torum omnium ac cogitationum intimarū
 secreti recessus, ubera, pignora. Qvod
 si *divinarum considerationi* rerum
 placet, vide ea, quæ Moses, quæ Pro-
 phetæ,

phetæ, quæ Apostoli, & oratorum incomparabilis Christus Jesus di-
vino spiritu promulgarunt. Si ju-
stitiæ & æquitatis arcana volueris
cognoscere; instituendus tibi sermo
erit cum Trebatio, Tuberone, Ul-
piano, Papiniano, Justiniano, &
consimilibus omnis honesti & uti-
lis publici defensoribus. Si valetu-
dinis tuendæ via & modus & sa-
pientia arrident animo; En Hip-
pocratem, Galenum, Theophrastum,
& post Senertum illum, tot medi-
corum five principes, five Filios.
Si amore & cognitione virtutum
ardes? Socrates, Plato, Aristoteles,
Cicero, Seneca, Prudentiam & do-
gmata monstrabunt. Si seculorum
acta & gestorum magnitudinem,
capaci pectore volueris concludere?
tum vero adire & consulere licebit
Persarum & Medorum Herodotum;
Græcorum Tucydidem ac Xeno-
phontem; Romanorum Livium,
Cæsa-

Cæsarem, Salustium, Florum, Tacitum, Polybiūm, Velleium, Valerium, Dionysium. Gothorum Johannem, Olaum, Loccenium, Schefferum. Germanorum Cornelium, Plinium, Marcellinum; Danorum Saxonem, Aventinum, Naticleram, Grantzium, Sleidanum. Polonorum Cramerum. & qvis omnes Historicos gentium, tam brevibus lineis coarctet. Carmina si possis; inspi ce Homeri Sapientissima eloqua, Pindari candorem, Hesiodi elegan tias, Virgilii majestatem, Ovidii venustum gratiam, Horatii doctrinalia, Statii gravitatem & reliquam tam immensam Poëtarum sylvam. Id uno verbo dico; *Religionis negotia, legum sacra, principem acta; rerum publicarum consilia, molimina gentium, mores populorum, bene vivendi præcepta, revelat.* Et aperit Bibliotheca elegans, tum Lectio fructuosa, attenta, frequens, tempestiva, stabilis, cauta, libera, prudentissima.

§. 4. *Lectionem ipsam ac cognitionem
Scriptorum, sequitur MEDITATIO,
calor doctrine, eruditiois vigor, me-
moria alerix, ingenii horreum.*

Utinam Praeclara juventus
hoc tam nobile Preceptum vellet no-
tare; exceptasq; per *Lectionem* ideas,
per *auditionem* faces, ventilare: tan-
tosq; ingenii & judicii thesauros, assi-
dua meditatione, intimis sensatio-
nis organis concredere. Tunc forte
pauci suam ossitantiam, suam insci-
tiam, suos juveniles annos, tam ma-
le collocatos, & sero. & misere deplo-
rarent. Hæc est illa doctrinarum
anima; illa magistra solidæ ereditio-
nis; ille fons perennis opulentia; un-
de manant prudentiæ flumina, dex-
teritatis maria, vapor orationis,
& rationis rectæ agilis promptitu-
do. Cernimus arbores altitudine
sua cœlos tangere; in longum &
latum ramos extendere; Foliis
C um-

umbrosas, floribus venustas, fructibus fœcundissimis purpureas: id in ipsis facit naturæ operatio, succorum digestio, balsaminus spiritus in meditulliis operans; tum ventorum susurri, exterius æstu, gelu, aura, veloci flatu agitantes molem. Eandem naturæ solertiam in perficienda *Sapientia* debemus imitari. Est enim *ingenium* nostrum valde debile, *memoria* quoqu fluxa & inconstans; præsertim si interventu aliarum cogitationum turbatur; runc sane facilime insculptas bonarum præceptionum imagines amittit, eaqu qvæ per *Lectionem* & *auditionem* comparavit, velocissimo casu deperdit. In tanta ergo nostræ infirmitatis miseria, grande adjumentum ab ipsa habemus *meditatione*; sine cuius auxilio difficulter consequimur *Scientiarum* abdita, *prudentie* arcana, *Sapientia* mysteria.

§. 5. Post oculorum & ingenii operam,
aurium ac judicij subsidia, requiritur
quoq; manuum labor, conjunct⁹ cum dis-
cursu intellectus. estq; nihil aliud
quam indefessa STYLI EXCERCI-
TATIO.

Hæc quam sit gratiosa & u-
tilis, copiose docet magn⁹ ille Schef-
ferus, toto capite decimo tertio,
in libello cui titulum dedit, *De styli*
exercitiis: ubi pariter *Veterum ardorem,*
cautionem & diligentiam, fideliter ex-
plicavit. *Enimvero illi, non tantum*
scriptionem esse magnopere neceſ-
sariam judicarunt; Verum etiam
loca lucubrationibus svavia, hortos,
sylvas, amœna fontium elegerunt;
ut vigor ingenii, alacritate & pul-
critudine aëris, terrarum, flumi-
num, & omnis jucunditatis inspe-
ctu accresceret, incrementaq; glo-
riosæ caperet: Sane vero, prorsus

notanter scribit noster Tullius : Nec
medici, nec imperatores, nec oratores,
quamvis artis precepta percepérint,
quidquam magna laude dignum, sine
usu & exercitatione, consequi possunt.
Videmus venatores crebro exerce-
tio sic temperare canes, ut prope-
modum omnia illorum iussa exe-
quantur acriter: insectantur feras,
aqvaticas aves glandibus perfoſſas,
deferunt in manus Heri, excubias
agunt bonorum, Domino fidelita-
tem, non jurant sed servant; & qvis
überem parvi animalculi pruden-
tiam ac sagacitatem explicare va-
let. Videmus generosam eqvo-
rum sobolem, illud martis fulmen!
illud operum nostrorum instru-
mentum! omnia militiae munera
prompte & intrepidè obire; quotiēs
ad conserendam pugnam se accele-
rant gentes, toties tamquam ad con-
vivi-

vivium progreditur eqvus, rotat caput, movet jubam, gressus glomerat, & saltando qvasi tripudiat: Mox fulmineo oculo ruit in aciem; hos ungulis qvatit, illos dentibus dilacerat, alios mole virium prosternit. Non timet laborum molestiam, non aspera locorum metuit, non ad fremitum bombardarum horrescit, non hostium turmas formidat. At vero unde habet illam generositatem ? forte à continuo *exercitio*, discursu, lucta, motu. Si ad exercitia humana veniendum, esset ennautarum filios! noñe naves prodigiosas, cum gemitu undarum euro velocius circumagunt, ac obliquo rectoque cursu. stupente Nephtuno, fluctuum vim, aquarum imperia, ventorum mugitus & prælia, eludunt ; jamq; ubi opus est, per foros discurrunt, gubernacu-

nacula flectunt, vela colligunt, per
funium gradus in altum repente e-
lati, iterum a rudentibus foliorum
instar pendent, levissimoqz motu se
erigunt & in instanti, conversis ve-
stigiis sese demittunt. Totam istam
folertiā debent usui; nam a pue-
ro, in cognoscenda indole maris, in
tractanda nave, in intelligendo O-
ceani fluxu ac refluxu, in motus
marium & ventorum dignoscendo
genio, artem, intentionem & studium
locarunt. Pari modo debet exerci-
tationi incumbere *Epistolarum Scri-
ptor*, ut possit de rebus omnibus,
intrepide, expedite, compte, copio-
se loqui. Hinc grande illud &
salutare præceptum literata juven-
tus altè pectori inscribat: *Quotidie
stylo aliquid temporis dandum.* Quo-
tiens cum cura Præclaros scri-
ptores legimus, quotiens animus
eo

eo igne calet, memoria turget, judicium discurrit, colligit, concludit; totiens ad scribendum accingant se se laboriosæ manus. Subibunt haud dubie acumen styli, *verba* ex recenti lectione florida, *sensentiae* penetrantes, *res* magnificæ, *compositio* svavis, grata, spirituosa. Vix crediderim, Tullium, Plinium, Scaligerum, Antonium de Gavarra & inimitabilem illum Erasmum, tanta mente, tanta fide, tanta facundia, tot epistolarum elaborasse agmina, nisi crebro usu genium firmassent, adversus onera temporum.

§. 6. Finis Exercitationis est imitatio, seu conformatio orationis ad genium emendatè & floridè scribentium.

Hoc præceptum, satis bene illustrat Edon Neuhusius, in suo Gymnasio Eloqventiæ: cuius quidem

discursum, qvamvis prolixior sit,
totum tamen exscribere volui ; ut
sciat juventus, quantum momenti in
IMITATIONE sit positum ; sic autem
pergit ille Belgarum doctissimus :

*De Publio Scipione Africano aliisque
civitatis Romanæ Principibus proditum
est, quod qvoties Majorum suorum ima-
gines in larario positas intuerentur, coties
res præclare ab ipsis gestas in memori-
am revocarent, & earum sese cogitatio-
ne ad ejusdem glorie similitudinem stu-
dio quodam & emulacione conformarent.*
Ita studiosa benarum literarum juventus
imaginem Eloquèriæ, eruditissimorum ho-
minum stylo expressam & perpolitam, o-
culis proponere deberet, ut quotidiana illius
contemplatione dictionem suam ad præ-
scripti artificii exemplum componere ad-
discat. Igitur qvoties Eloquentium autho-
rum scripta & commentationes legit, ipsa
oratorii opificii lineamenta considerabit,
colorum variorum speciem & ornamenta
suo positâ loco notabit, totius operis stru-
eturam partiumque compagm animad-

vertet :

vertet: quæcunque aut' in verbis elegan-
 tia; aut in rebus perfectio dignitasque fue-
 rit, studiose & solerter observabit. Qui in
 exteris proficiscitur regiones, patios di-
 versarum gentium cultus notat, locorum
 & turbium situs attendit, hominum mores,
 Recump. leges, civitatis habitum curiose
 inquirit. Qui in opulentam venit domum
 ædificii structuram intentis oculis perlu-
 strat, suppelæctilis apparatum & colloca-
 tionem decorâ contemplatur, quid descri-
 ptum in parietibus, quid signatum in tabu-
 lis, quæ hominum bestiarumve in vitreis
 fenestrâs, aut vasis porcelinis expressæ ima-
 gines, in memoriam desigit. Qui in hortum
 accedit omni florum fructuumque genere
 verantem, flosculum oculis grato colore
 ad blandientem decerpit, herbam suavi o-
 dore fragrantem vellit, cerasum prunum-
 ve dulci sapore gulam proritancem degu-
 sat. Non minus adolescentes, peragentes
 præstantium authorum libros & in ipsa
 Eloqventiæ recepti penetralia, ornandæ
 formandæque dictionis artificium obser-
 vare oportet.

Neque sanè exiguum ex istà operà fru-
ctum percipietis. Ita namque continget,
ut ad propositum benè dicendi exemplum,
tandem & ipsi bene dicatis, eosque qui
ingenii lumine & eloquentia præstiterunt,
orationis vestræ similitudine effingatis.
Consecutus est illam suæ solertiae mer-
cedem Demosthenes, qui descripto septies
Thucydide, observatoque ejus in dicendo
artificio, vivam Thucidis effigiem in se
ipso expressit. Consecutus Cicerio, qui cum
Græcorum dicendi rationem diligentissime
notaret, Demosthenis vim, Platonis copi-
am, Isocratis gratiam repræsentavit. Con-
secutus Virgilius, qui multumque diligen-
terque in Homerilibris versatus, divinum
Poëtæ ingenium & carminis majestatem
aut æquavit, aut superavit. Hinc patrum
& nostra memoriæ Rembius, Longolius, Mu-
retus, Manutius aliq[ue] Ciceronius, Erasmus &
Melantbon Terentius, Lipsius, Seneca; Vi-
gas, & Sannazarus Virgilii; Buccananus
Horatii; Hessus & Seigelius Ovidii stylum
dictionis quadam similitudine retulerunt,
Sotius vero, Thomas, Lombardus Fulgentius
illa Monachorum barbaræ etatis agmina;

qvia

quia nullum in Latinis auctoribus Elo-
quentiae artificium ad quod omni se mente
componerent, annotarunt, ita prodigiosè,
obscure, contaminatè scripserunt, ut in
tradendis rebus & explicandis, oratione,
judicio caruisse, & infantissimè garrivisse
videantur. Incredibili homo voluptate
frui sibi videtur, cum propria in domo ad
sui foci ignem assidet, & sua partum indu-
stria cibum comedit. Non minorem sane in
literarum studiis delectationem sentimus,
cum ex præstantissimis auctoribus obser-
vato dicendi & ratiocinandi usu, proprii la-
boris fructum percipere, cum est usus, licet.
Qvam est acerbum, si pedibus tuis insisteret
nequeas, alienis humeris inniti? Qvam
molestem, si propriis oculis cæcutias, vici-
norum lumine uti! Qvam miserum do-
mestica laborantem penuria aliunde vitæ
tolerandæ subsidium pudenter solliciteq;
corrogare! Tam grave onerosumque est
virum literis deditum, nulla observationum
suarum opera adjutum cum scribere ali-
quid aut dicere voluerit, cum primum hinc
inde excurrere, & aliorum labore & indu-
stria suam inopiam sublevare. Romani
qvi-

quidem Principes in Consulatus aut 'Præ-
toræ petitione vulgi gratiam aucupantes,
Nomenclatores apud se habebant, qvorum
ore suo quemque nomine appellabant. Sic
illud literatorum genus agit, quod cum ni-
hil ex recondito Annotationum suarum si-
nu & cella quasi promptuaria de promere
valeat, in extrema rerum verborumq; pe-
nuria, alieni oris & laboris subsidium mu-
tuatur. Quod dum dico. *Calvisius ille*
Sabinus, cuius Seneca meminit, risum mihi
proritat, qui cum ignarus ipse esset, & glo-
riam tamen ex literis quereret, multo do-
mi servos alebat, de quorum ille doctrina
tanquam de sua se jactabat. Igitur exceptos
ex ipsorum ore versus recitabat, convivas
insuffratis qvæstiunculis exagitabat, ad
res omnes, de quibus obortus esset sermo
edoctus ab adstante servo, respondebat:
stultus qui eadem ratione peculium & sa-
pientiam domino queri putabat. Illum
Satellius ad luctadum secum provocatum,
cum exoleti corporis confectas vires que-
reretur, non illepide arguit: *Nels,* inquit,
*Sabine, valetudinem tuam culpare, qvæ ser-
vos habest am validos, mng, multis. Calvi-*
ho

si similes sunt otiosi illi præstantium scri-
ptorum lectors, qui cum nullos domi sua
industria observationum acervos constru-
xerunt, quoties proferte aliud in me-
dium volunt ad auxiliares aliorum copi-
as confugiunt, suæq; inopiae lacunas emen-
dicata hinc inde stipe difficulter explent.
*Quod si in istos Satellius incideret cavilla-
tor; His vos, diceret, homines res eximie
retrusaq; eruditionis, qui libros habentis o-
mni eruditione instrutissimos.* Omnes
liberalium artium disciplinæ, omnes ma-
ximarum rerum scientiæ, omnis recte a-
gendi ratio vitæque conformandæ præ-
cepta, observatis exemplis & notato præ-
cellentium authorum usu initium sum-
pserunt, factoque per illorum vestigia pro-
gressu sensim ad perfectionis suæ terminum
pervenerunt. Neque quisquam unquam
in aliqua arte eminuit. qui non observata
propositaque sibi peritorum hominum o-
pera, ad eam similitudine quadam expri-
mendam omnes animi sensus fixos crebro-
que detinuit. Atque in eo homines Natu-
ram ducem seqvuntur; quæ cunctis rebus
magnis & præstantibus hanc legem indexit
ut

ut quæ in excellenti admiratione gloriae ve
elucerent, ea nec repente, nec universa le
profunderent; sed lenioribus prætexta ini-
tiis ab exemplorum observatione exor-
dium caperent. His insistens vestigiis
Augustus Imperator si quæ involendis u-
triusque linguae authoribus, exempla aut
præcepta publicè privatimque salubria
occurserent, diligenter annotabat, & sæpè
ad verbum excerpta ad civitatum & exer-
cituum rectores mittebat, ut ad illorum
præscripta & monitione Remp. gubernan-
tent. Fortè illam legendi observandi
que consuetudinem à *Cesare patruo* tra-
xit, qui cum adolescentulus esset, ut quæ-
que digna memoria in authoribus ad ma-
num veniebant, ea excerpta studiose in
Adversariis describebat, quæ *Collestantea*
ipse appellavit. Nec in extrema quidem
senectute *Cato* hoc industriæ genus ne-
glexit, qui multorum facete dicta, quæ
Διοφθήματα vocantur, in unum librum
collegit. *Plinius* verò incredibilis fuit in i-
sta studiorum contentione diligentia, qvi
nihil unquam legit, quod exasperet:
eum nullum librum tam esse improbum
diceret,

diceret, ut non aliquem sui usum
præberet. Neque *Avicenna* quidem
ab isto labore abhorruit, qui inter
legendum si quid ignotum sibi pri-
us reperisset, in libello *CHALEKTAV*, quem
assiduè secum circumge stabant, annotavit.
Pari annotatæ descripçæq; lectionis indu-
stria *Africanus Xenophontem*, *Alexander*
*Mammeæ F. Platонem & de Officiis Cice-
ronem*, *Alexander Macedo Homerum*,
Virgilius Ennum, *Virgilium Augustinus*,
Augustinum Carolus Magnus, alia aliorum
libros pervolverunt. Et ne ex recentio-
re ætate hominem nostri cœli prætermis-
tam. *Rodolphus ille Agricola*, qui ex mul-
torum annorum caligine primam ad rectè
Differendum facem accendit, *Plinius biso-
riam naturalem*, *& Pliniij junioris epistolæ*,
*& Quintiliani de Oratoria instruzione li-
bros*, ita attente studioseq; legit, ut non tan-
tum res dictionemq; eorum memorabi-
lem, sed libros integros descripsérit quos
cum Platone & Cicerone perpetuos viræ
viæque comites secum circumiulit. Scili-
cet experiundo cognoverant præclarissimi
viri, nullam in lectione positam esse utilita-
tem,

tem, nisi absolutissima authorum com-
mentatio & opera artificiosa observaretur,
ad cuius lineamenta & figuram res ipsa
nostras conformaremus. Sed scire cupi-
atis, Adolescentes, quid illud sit quod
maxime admodum in bonorum autho-
rum lectione sit observandum. Mi-
ra fuit *Lydi* illius *Ariemonis* fatuitas, qui
in Crœsi intromissus thesaurarium, ut
quod vellet secum auferret, ad conspectum
prodigiosæ opulentiae obstupefactus, cum
quid potissimum sumeret, ignoraret; ad
aurum rude & impolitum accurrebat, na-
sumque illicò, os, aures & omnia corporis
cava auri ramentis opplebat: ita ut nec
cognosci ob insolitum habitum; nec pro-
gredi præ impedimentis & sarcinâ ponde-
rosa posset. † † †

Utinam allegatione hujus disserta-
tionis, tam facundæ, tam necessariæ,
tam gratiosæ, aliqvid possem effice-
re apud succrescentem in laudem pa-
triæ sobolem, tunc sane me eam de-
scripsisse non pœnitet nec piget...

CAP. QVARTUM
DE EXTERNIS ADIUNCTIS EPISTO-
LARUM.

§. I. Inter Externa Epistolarum ad-
juncta, numeratur primo Proloqui-
um: quod nihil aliud est, quam hono-
rifica compellatio ejus, ad quem scri-
bimus.

Circa hoc negotium, duo potis-
simum solemus observare;
mentionem nominis, & addi-
tionem salutationis, quæ, *Candida
vetustas* non malo usu coniungebat.
Hoc modo M. T. C. Lentulo
Procoff: S. D. Plinius suo Tra-
jano, ista abbreviatione S. P. D. *sa-
lutem plurimam dicit.* Græcorum id
more Romanos fecisse novimus, &
hodie quoque iisdem utuntur eruditi,
ut ex actis seculorum constat. Isocrates
Macedonum Regi Philippo *χαιρεῖ*,
id est *Gaudium vel Salutem* precatur.
Alii utuntur isto *ὑγιαίνειν sanum esse.*

D

He-

Hebræorum sapientibus ; & in his solenne fuit Paulo, illam apprecatio-
nē præmittere, *Pax Christi*, quæ Theologis deinde multum placuit; donec
& illam adderent formulam *Emanu-
el*, h. e. *Deus nobiscum*. Qvæ omnia
bene & piè se habent. Si vero mo-
derandus stylus est, ad usum nostri
ævi; tunc sane prudenter dispici-
endum, quid cuiquam dignitati , genti,
æratibus conveniat. Hodie, si Po-
liticas intuemur Epistolas, raro no-
men præpositum invenimus; ejus
loco potius solennes compellandi
Fomulas. *Augustissime Cæsar*; *Sere-
nissime Rex*; *Sanctissime Papa*; *Celsissi-
me Princeps*; *Cardinalis Eminentissime*;
Reverendissime Episcope; *Abbas, Prælate*;
Admodum Reverende Theologe; *Adseffor*
*Nobilissime, Amplissime; Consultissime Ju-
ris Doctor*; *Experientissime Medice*; *Do-
ctissime Philosophie*; *Prudentissime Consul*;
Magister Clarissime; Ceteri inferioris
ordi-

ordinis Cives, *Ornatissimi* titulo, *præstantissimi*, *Candidi*, *Prudentis*, *honorati*, contenti esse solent.

§. 2. *Jam vero circa distributionem titulorum nos valde cautos esse oportere, sicut et ratio, et candidissima civitatis leges.*

Simplicitas veterum, in titulis distribuendis erat satis moderata; Inde Aug. Cœsar, ad licentiam illam, ut opprobrium suæ Majestatis cohorruit. Post ejus fata, ritus temporum, alios mores invexerunt; & tunc cœpit Plinius, *Trajanum* appellare *Imperatorem sanctissimum*; & id quidem non sine judicio. Mox quasi è divite adulatorum penu, in consuetudinem abiere propemodum infinitæ figuræ compellandi omnis ordinis & gradus homines: Circa quorum delectum vehementer hortor esse vitandas offensiones; sitq; quilibet in hoc officio exhiben-

do castus, moderatus, liberalis; non tamen proterve satyricus, qvalis ille fuit, qui Theologum Pontificium, appellavit *Hereticorum Malleum*. *Archidux* vox Romana quidein non est, periculo tamen nequaquam caret, negare hoc illis velle, quibus debetur. *Reverendissimus* paricer auctoritatem classicam non habet, usurpant nihilo secius Lipsius, Caſaubonus, Vossius. Scilicet varias formas, cum quolibet tempore induant illustrium Virorum tituli, qvos variare & invertere non cuivis permittitur, monente Vossio lib. de vitiis sermonis lib: I. 16. Hac occasione commendamus Juventuti non malum Præceptorem, Frederich: Becchmannum, qui, de dignitatibus *Imperatorum, Regum, Pontificum, Principum, Ducum &c.* eruditum librum usibus literati orbis nuper comodavit. Magistratum vero & officialium

ficialium cujuscunq; gradus & or-
dinis tituli, quo schemate, qva serie,
sint disponendi, docet prudens ta-
lium elegantiarum Politica, quolibet
fere die, apud tot terrarum gen-
tes, satis variabilis. Modestissime
adire Reges, eosq; in plurali adlo-
qui, Barclajus & alii monstrant: Ci-
ves vero, Gnatonico stylo, tanquam
principites cerberos, adorare, à stultitia
non multum aberit. Nonne lavissi-
mo risu delectant istæ compellandi
deliciæ: *Saluto Vos Reverendissime Mar-
colphe, quid agunt Vestræ Dominationes?*
Hos mores, hanc stolidam ambitio-
nem, lavaviter castigavit Claudius
Memmius, in Epistola ad Archie-
piscopum Johannem à Lipie: *Sine
me, inquit, Tecum Presul Scientissime,
Latini Sermonis Majestatem retinere; Fa-
cessat inter nos nova ista titulorum ser-
vitus, qvi seriem sermonis abrumpunt,
sententiam sepe contorquent,* *Et animu-*

per

per tot flexus adocant, ut hodie facilius
Deum alloquaris, quam hominem. Cui
vir ille doctrina maximus, animo
pariter & stylo tam Romano re-
spondet, ut satis appareat, in priori-
bus illum literis, invitum *ritibus moribus*
z etatis, induluisse. Credo tales
inceptias non modo literatos in um-
bra; verum etiam Eminentiores in
luce publica viros, oppido damna-
re; utpote quorum mentibus in-
scripta sunt illa doctorum judicia:
Absit Error, absit vanitas, ne salutatio sit
vel loquacitate molesta, vel assentatione
parasitica, vel affectationemorosa: ne quod
diximus in fronte, pessimum sit omen
Epistola, si statim à vitio fecerit auspicium. Itaque dum vani irrisores
festivis calamis ambientium cupi-
ditatib⁹ adulantur, licebit cordatiobi-
bus ingenitam lingvæ gratiam vin-
dicare. Atqui pro istis tam putri-
dis solennitatibus; *rogamus Vestram*
Excel-

Excellentiam; optamus ut *Vestra Ampli-*
*tudo sit salva: dabimus operam ut *Vestra**
Nobilitas nostram observantiam intelli-
gat: paulo commodius scribamus:
Hoc beneficii genus Excellentiss: Tuonomi-
ni deferre libenter velim. Faxit Deus,
ut Illustriss: Tu Capiti omnis felicitas
adfulgeat. Dabo operam ut Tanto Viro,
meum, quo ad viro, constet devotum offi-
cium: si delectat curiositas accurata,
evolve actorum publicorum ta-
bulas: In quibus locum non ulti-
*mum tenet Leonis ab Aitzema *Histo-**
**ria Pacis;* ubi Singularia invenies,*
quæ Tullii temporibus non erant
in usu. Qvod ipsum benè & sapi-
enter notavit ille, in Eloquentia hoc
ævo longè celeberrimus, Christia-
nus Weisius.

§. 3. Sunt & aliae externæ Epistolarum
 attributiones, utpote valedictio, sub-
 scriptio, complicatio, obfignatio, ipsa
 denique inscriptio: de quibus singulis,
 bac notamus. Ut

Ut à salute ordimur, sic valēdictione claudere Epistolas solemus. Græci veteres usurpabant: εὐτύχει felix es, item ἔρωσο Vale. Qvæ Romanis quoque frēquentata, quemadmodum ex hisce clausulis videre est. Vale recte; bene vale; Cura ut valeas; communem valetudinem fac eures diligenter: Sit tibi curæ tuae valeudo. Age curam valetudinis Tuæ. Et cetera que diligenter in Institutionibus suis Epist: collegit. noster Erasmus. Est & alia acceptio hujus vocis; etenim priisci mortuis quoque dicebant Vale: Ita Poëtarum Princeps Virgilius Pallantem affatur.

*Salve eternum mibi maxime Palla,
- - - - - eternumque Vale!*

Ovidio quoque variis in locis, hæc phrasis placuit: sic 6. lib. Metamph:

*Supremumq; Vale pleno singulis ore
dixisset - - - - - 5 lib. 7.*

*Mutua dum licuit reddebat dicta Valeq;
con-*

conjuncti dare simul. & lib. 10.
 Supremumq; Vale quod jam vix auribus ille
 acciperet, dixit. lib: Fast: 4.
 Osculaq; applicuit, posito supra ^{ma}feretro
 Atq; invito, Frater adempte Vale
 Aliquando maledictionis significa-
 tionem quoq; Vale obtinet; sic
 Terent: *valeant qui inter nos diffidium
 volum* h: est. Ita à nobis discedant,
 ut nunquam ad nostrum rever-
 tantur adspectum : Ceterum qui
 plenam vim verborum *Vale, salve*
 & *Habe* cognoscere desiderat; con-
 sulere potest Barnabam Brissonium
 de Solennibus P. Rom: formulis; &
 quidem librum in ordine Octavum;
 nobis enim ad alia veniendum est.
 Christiani solent addere felicem di-
 vinæ gratiæ & protectionis appre-
 ciationem, simul salutem uxori, li-
 beris, familiæ, notis amicisq; dice-
 re. Politici dum de statu publico lo-
 quuntur sic solent claudere, *De his
 piderie*

videtur magnus ille rerum humanarum
rector ac director; cui Te Tuosq_z animi-
tus commendo Lip. ep. 63. Cent. 2. Mi-
nas iterum hic audimus & apparatum:
Deo rem committo, qui publica ista ex
sui nominis & numinis gloria dirigat &
Temi Ortelli servet. Frequens est & ille
mos, annum, diem & locum, quando
scribuntur & unde mittuntur lite-
ræ, signare. Hoc Græci per Olym-
piadas mensesque: Romani per
Annum conditæ urbis ac saepius
per consules, tum ut diem etiam
adiicerent, per *Calendas Nonasq_z* ac
Idus computabant. Sic Datum 4 Ca-
lendarum Junii i.e. quarto die ante
Calendas Junii sive 28 Maii; hic e-
nimir quatvor diebus antecedit ipsas
Junii Calendas. Annus vero sic a
Tullio signatus legitur, Calendis
Februarii M: Messala & M. Pifone
Coss. qui erat annus urbis conditæ
692. Locus, nam raro horam nota-
bant,

bant, non semper exprimitur si in-
tuta sunt tempora; si secus occur-
rit Datum Romæ; scriptum Man-
tuæ sive ē Mantua: Holmiæ, Aboæ,
Ex arce nostra, Tusculano, Musæo,
Castris, &c: Subiici quoqve Episto-
lis hac ætate plerumque solet *nomen*
scribentis cum officiosa obseqviorum
declaratione, ut si ad consulem in-
ferior aut æqvalis scribat *Amplissi-
me* T. Dign. Servus N. N. fidelis
amicus; vel perpetuo amore devin-
ctus N.N. si par fuerit. Per alium
qvoq; alios salutare plane solenne
fuit & manet, fit illud apud erudi-
tos his modis: *Atzico nostro multam*
ex me salutem dicio. Uxorem tuam ac
liberos mellitissimos omnes meis verbis
salvere. Fubebis. Generum mea causa sa-
lutabis officiose. Parentem optimum meo
nomine salutabis diligenter. Totam fami-
liam tuam per Te meis verbis salutatam
dolo. Amicis omnibus communem ex me
salu-

salutem dicitur Complicationis varia & multiplex est inventio, quadrata, oblonga, major vel minor, consuetudini gentium ubique terrarum correspondens. Post obsignationem cera, vel bitumine cocto, additur Inscriptio; quae & nomen, & dignitatem, & officium Personæ cui destinatur, complectitur. Harum varias species ad Imperatores, Reges, Magnates, Curias, Consistoria, Collegia, tum privatos homines, pete ex quotidiana praxi & consuetudine temporum.

CAP. QVINTUM DE STYLO EPISTOLARI

§. I. *Per Stylum hoc in loco non intelligo aliud quam habitum orationis, quo scilicet amictu, in publicum prodire debet Epistola.*

MUlti iisque doctissimi seculorum viri, ab hoc scriptionis genere, Eloquentiam floridam

dam, ornatum justum, & acuminata penetrantia segregant; quasi iste apparatus sit Oratorum proprius. Quorum quidem rationes, in se tam eruditas, nequaquam contemno, illud saltem, quod olim cecinit Poëta

*Gratior est pulchro veniens è corpore
virtus,*

Ad præsens negotium puto me posse non incogitanter applicare; Habeant ORATORES suam Pompam maiestatem, numerorum gradus & dignitatis eminentiam; servent VATUM Principes profundam svadram & insigne decus: Teneant institutum excellens & florentissimum HISTORICORUM MAGNATES. Ego in hac sententia maneo: Epistola eo appareat laudabilior, quo matronali byssso, colore vivido, civili elegantia; potius, quam mere-tricia larva, scabiosa facie, deniq^z turpi

turpi ac rabuloſo fremitu, ſiftit ſe
ſpectandam ingeniis Prudentium.

§. 2. Debet itaq; ſtylus Epifolaris apta-
ri, partim ad materiam, que explica-
tur; partim ad ingenia scriptorum;
partim ad personas, ad quos mittun-
tur, qvorum & dignitatis, & auco-
rūtatis, cauta habenda eſtratio.

Hanc legem circa characte-
rem Epifolarem plano & evidenti
discursu hoc modo explicat Era-
ſmus Rotherodamus: *Qui in Epifo-
lis unum aliquem characterem vel requi-
runt vel praefribunt, id quod ab erudi-
tioribus etiam quibusdam video factum,
ii mihi nimirum de retam multiplici pro-
peque in infinitum varia, nimis anguste
atq; arcte videntur agere. Neq; ſane i-
ta multo minus absurdē facere eos ex-
iſtimo, quam ſi ſutor omni pedi ad ean-
dem formam crepidam velit conſuere: aut
ſi pictor quodvis animal iisdem lineamen-
tis, iisdem coloribus conatur pingere; aut*
Sarei-

Sareinator consimilem vestem pumilioni
aut Giganti tribuere studeat. Negant
Epistolam ferendam esse nisi quæ intra ex-
ilem dicendi figuram sese contineat: nisi
quæ illaborata dissoluta fluat, & omni-
bus contentionis nervis careat: nisi deni-
que brevitate ipsa Epistole nomen mere-
atur potius quam voluminis. Hanc for-
mam si quis suo quodam instituto se qui-
malit: ut saepe numero pro ingeniorum va-
riete, aliud scribendi genus alii magis
arridet: cum hoc equidem non admodum
pugnabo; sit enim per me suum cuicunque pul-
chrum Verum si eam nobis ita prescribit,
ut vel solam vel optimam haberi pote-
rit: cum argumentorum species non mi-
nus sunt innumerabiles quam Mund-
illi Democratici, & nullum fere argu-
menti genus non recipiat Epistola & nus-
quam oporteat orationis habitum, cum ar-
guenti genere dissidere, qui quoquo potest tamen
in infiniterum varietati simplex sermonis ca-
racter accommodari? Quem quidem ut vel
maxi

maxime alioqui per se optimum deligas,
fieri tamen non potest, ut idem ubique optimus
esse videatur. ego tum unamquam
orationis figuram optimam, existimо cum
maxime in loco adhibetur: tum pessimam
quoties juxta priscum Græcorū adagionem
τὸν Φακῆ μύρον, hoc est, in lente unguentū
ad misericordiam. Atque hec eruditis abun-
de satis in summa dicta fuerint. Ceterum
literatoribus istis quibusdam eruditiis,
ut multo indoctioribus, ita non paucis
magis importunis pingviore (quod ajunt) Mi-
nerva & per partes satis faciendum esset
sed hoc indoctum doctorum genus & illi-
terata Literatorum turba, Literariis in
Iudicis hodie præcipue regnat, & tanquam in
sua tyrannide phalarismum quendam ex-
ercent. Nec alia mens fuit Græcorum
Demetrii, qui illas Epistolæ adsurgere fa-
cerunt, que aut Regibus mittuntur aut Ci-
vitatibus. Qvare concludit; non usque
quaquam veram esse eorum sententiā, qui
absolue negant: Epistolam, alium quam
tenorem admittere characterem.

§. 3. Antequam definio, quæ figura distinctionis cuicunq; Epistolarum generi competit: non inutile erit ex Rethorum placitis repetere, triplicem illam orationis formam humilem, sublimem & magnificam, tunc, qualis cuiusque genius sit, explicare.

Non ignoro stylum pro diversitate materiae, infinitas propemodum induere formas; ita ut appareat jam sublimior & vehemens; modo submissior & ienis; iterum minaci colore iracundus; nunc lætior, limatior, amabilis; aliquando diligens, dulcis, facetus, candidior & fusus; mox bellatorius, cōcitatus, pugnans & gravis; tandem varius, argutus, dolosus & penetrans. Nec illud me latet, stylum pro diversitate eorum qui scribunt esse, vel Poëticum liberum, fusum, pictum, metrorum legibus inclusum; Historicum, sincerum, condatum, judiciosum, æquali gratia

E pro-

profluentem : *Philosophicum*, purum,
tersum, securum, nullis calamistris,
nullis terminorum obscuritatibus
perplexum. *Oratorium*, nervis, vi
& efficacia ubiqꝫ plenissimum ; hæc
inquam & talia, non penitus cogni-
tionem meam fugiunt. At vero
dum tot formas, tot vultuum ipsi-
us styli imagines contemplor ; sin-
gulaꝫ examino ad normam *junctu-
re, Ordinis, periodorum, ac numeri* ; Se-
positis tot scriptoribus, tanta inge-
niorum diversitate, libero spiritu,
Tulii amplector sententiam ; qui
characterem styli tantummodo tripli-
lem fecit : *Humilem, Sublimem, Magni-
ficum* : verba ejus hæc sunt : Tria sunt
omnino genera dicendi, quibus in singulis
quidam floruerunt. Nam & grandiloqui,
ut ita dicam, fuerunt, cum ampla &
sensiarum gravitate & majestate verborum
vehementes, varii, copiosi ad promovendos
& convertendos animos instructi &
rati :

rati: Alii levi & instructa & terminata:
 Et contra tenues acuti, omnia docentes &
 dilucidiora non ampliora facientes, subti-
 li quādam & pressa oratione limati. Qui-
 bus mox adsentitur recta ratio; nam
Humilior sermo puritatem, candorem,
 elegantiam amat: **Sublimior dictio**
 amoenitatem floridam & solennita-
 tē cum delectatione addit: **Magnificen-**
tior apparatus robur, fulmina, splen-
 dorem gloriosum elit, amplecti-
 tur, ostentat. Jam vero quæritur;
Quā stili imagine scribi debent Epis-
 tole? Circa hoc punctum relictis ali-
 orum opinionibus, meam sententi-
 am candide pronuncio.

§. 4. *Epistolæ Theologicæ ut retractant
 mere divinas, illaq; tam ardua religio-
 nis veræ negotia, ita necessum est cha-
 racterem earum alium esse non pos-
 se quam infucatum, gravem, adamans-
 tinum & pro genio scribentium va-
 rium.*

Lege & considera Apostolorum ad varias Ecclesias ablegatas Epistolas; quamvis omnes super unum angularem Lapidem Christum fundant suos discursus, sua colloquia; quae licet profus & plane in fundamento fidei convenient, distinctionis tamen ratione, tum populorum ad quos mittuntur, vel simplicitate vel acumine discrepant. Sic Apostolus Paulus in Epistolis ad Romanos subtilis est: Ad Corinthios doctrinalis; Ad Ephesios reliquasque gentes placidus; Ad Hebreos tonans & magnificus: utpote qui cultum & pignora a Deo oblata, vel neglexerunt proterve, aut contempserunt stolidè. Parifere modo cetera, quae ad cognoscendum Numen, ad venerandum Christum, ad amplectendam S: S: gratiam ad servandum ordinem in Ecclesia & Politia, posteris communicarunt
Aposto.

Apostolorum singuli : In sanctorum quoque Patrum & plurium Theologorum placitis , qui super æternitatis fundamentum pie & caste ædificarunt, multas Epistolas invenies, constater ratione rerum scriptas, quamvis in stylo , magnam varietatem deprehendes.

§. 5. Epistola Politice, quoniam spectant Regnantium honorem, Regnorum Gloriam, tum virorum civilia tractantia- um negotia, consilia, actus ; idcirco Orationem decora sapientate fluidam tum moderatione venusta amant.

Carolus Paschalius præter Cognitionem Juris & Notitiam Historicas etiam in Politico desiderat artem dicendi: profecto Politici nomen tribuere illis qui Eloquentia carent, qui nec loquendo nec scribendo, ad minimum alterutro modo negotia civilia prout par et opus est expli-

explicare nequeunt, nulla idonea
ratio permittit. Eumvero si is est
reponendus in numerum pruden-
tium, qui regere consiliis Populos, e-
mendare judicio gentes, combina-
re per confœderationes imperia, co-
ram Regibus, coram Senatu apte
dicere potest, quid dicendum de
illo, qui Epistolis svasoriis & Hor-
tatoriis bella extingvit, pacem con-
firmat, societas combinat, ami-
citas componit, Regum & Rerum-
publicarum dignitatem ac sanctita-
tis eminentiam conservat. Lycur-
gum laudat Plutarcus, quod in re-
pub: gerenda, actu juxta oratione si-
vetum verbis factisq; magnific⁹ erat. Ego
inter Schemata dictionis Politicæ,
audeo ponere præter judicii recti-
tudinem ratiocinationis expeditum
acumen, tum intelligentiam rerum
civilium, promptam & profluen-
tem, non tam sermone quam scri-
ptis

ptis Eloqventiam, perspicuitate notabilē, nativa simplicitate illustrem, congruenti dignitate splendidam, tum sanguine plenam & auctoritate commendabilem. *Hec demum Oratio vere civilis est, que virtutem suam intimis negotiorum Civilium rationibus, & naturis actionum aptissime dexterimeq; conformat;* ut notanter loquitur idem Bœclerus in dissertatione de Eloqventia Viri Civilis, cuius sapiens discursus, ut & Augusti Buchneri super idem argumentum cogitatio, Politica ingenia, in hoc negotio, mirifice juvant.

§. 6. Epistole Pomposæ sectantur ut plurimum stylum solennem, gratiolum, magnificum, Et quidem eum, quem supra sublimem appellavimus.

Qui sensum habent illustrem, facile vident me, de quotidianis illis schedis, ne cogitationem qvi-
E 4 dem

dem suscipere; sed de eruditorum & verè sapientum elaborationibus loqui; qvas dum inter se confero, examino, dijudico; intelligo & miror, qvam generosa facundia certant cum Panegyristarum intentione, affectu, gloria.

§. 7. Epistola Familiares, quoniam ad amicos plerumq; scribuntur; idcirco sermonem imitantur quotidianum; inde plana gratia delectant legentium animos.

Cum ennodius vir longe celeberrimus legem Epistolarem posneret negligentiam; Et sapiens Romanorum Seneca Hallucinationem atque illaboratum sermonem: Credo ambos tunc cogitasse de habitu Epistola familiaris. Ex isto fundamento non male Keckermannus videtur inferre: Sermo tum demum verè familiaris est, cum ingenuus & simplex est, & cum

non

non habet affectus vobementiores aut affectationem quandam. Ita quoq; Epistola similitudinem majorem habitura est cum familiari sermone, si in ea eluceat simplicitas quedam ac ingenuitas, & affectuum lenitatis. Concludo igitur cum Bohuslao Balbino, ex illius judicio de studiis humanioribus: in levi argu-
mento ad amicum latine loquere,
cetera amor & prudentia dictabunt:
nimirum humili figura heic omnino
locum habet, isto tamen salis tem-
perata grano, ut anxietas morosa ab-
fit, ut scopæ dissolutæ nequaquam
appareant, ut orationis imago sit
conformata planè ad speciem E-
pistolarum Tullii ad Atticum. Qvod
si vero de amici fide dubitas, ejusq;
ingenium per literas volueris ex-
plorare, consule nostrum Claramon-
tium, qui te forte docebit, acuto
stylo & occulta satyra ludere: Ve-
rum enimvero, abstrusa est hæc

Philosophia nec nisi paucissimis cognita.

§. 8. Est quoque solenne inter Magnates potissimum & acutos politicos, formare Epistolas per characterismos musicos, ziphras arithmeticas, & characteres alphabeticos, &c.

Sed quoniam hæc, ut ita dicam contechnatio, meum captum superat; neque commodum invenerim ad illam artem manuductorem, qui tantum aulicum profundum me quondam docuit, proinde præstat tacere, quam male loqui de argomento abstrusissimo; consulere tamen possunt ingenia sciendi avida Athanasii Kircheri Informationem Principum, ejus Musurgiam magnam; tum Caspari Scotti Magiam Crypto-graphicam, à pag. 40 ad 90 usq; ubi hoc arcanum satis evidenter evolvit. Tuttissimum

tissimum tamen est sincere & candide agere in omnibus, eoque stylo negotia explicare, quo ea olim expoluere Politicorum Phænices *Josephus & Daniel*, qui post ea tempora, vix pares habuerunt in mundi latitudine: nam ut *vera prudentia* planitatein & veritatem sectatur; sic *astutia*, nescio quomodo se occultat, ut ferocius imperet, ac in clades mortalium surgat.

§. 8. Solenne quoque est magnis Ingeniis carmine constringere, versuq[ue] delicato Epistolas ostentare.

Magna est Poëmatis, acutè & floride concinnata svada. In qua assurgere paucis datum est; scio tamen e recentioribus perplurimos *Grotios, Heinsios, Taubmannos, &c.* heic excellere; candida vero vetustas, inter aliorum opera, *Horatianas Epistolas & Ovidii Heroida*, singulari arte con-

conscripta, nobis invidere nequaquam voluit.

§. 10. Tandem exp' orare velim quemlibet,
quid valeat, quid vere recusat ferre; cum
enim cuique homini, suis sit impressus
indolis character, ita frustra proprie
nature obnitiatur.

Elegans & amabile quidquid ex
proprio; Vscosum vero & invenustum, quod
ex alieno nascitur, ait ille. scil: ad uti-
litatem cujuscunq; ingenii perplu-
rimum refert, ut in teneris annis,
ad hoc quisq; institutum applicetur,
ad quod videatur tota natura pro-
pendere. Multi dum sursum deor-
sum volvunt omnia, suis actiones pul-
cbras prædicant, suis studiis & in-
ventis, quamvis ridiculis, oppido
blandiuntur; putantes hinc immen-
sam ipsis advenire laudem. Sed
quantum opinot alibus, temeritate
vana luxuriantibus, imponit, tantum
quoq; honoris ipsis decedit penes
pruden-

prudentes. Dum in Parnasso déliberatur de remedenda multitudine librorum; Illam sententiam pronunciavit Collegii Præses: non sit injuria mundo, quia sponte vult decipi: tum vero regessit Adsefforum proximus, comburenda esse scripta inutilia. At Apollo mitiori manu putavit tractandum esse hoc negotium, timendum casum ne universus orbis concepta flamma, totus in cineres abeat, adeoq; perivasit adstantibus, vile esse chartæ pretium, fumi vero, quod post busta pagellarum relinqueretur, prorsus nullum. Applaudebat mox Heliconis concessus: Caput Consistorii vera Pronunciaſſe; adeoq; inepta scripta que vix quidpiam habent salis, relinquenda vulgaribus ingeniis: qui nihil probant, nihil intelligunt, nec aliud aucupantur, quam famam inceptam: Illustra vero Opera, Excellentioribus mentibus reservanda quæ fundamen-
ta capiunt, quæ anatomiam singularum

& omnium partium didicerunt exercere,
quæ sepositis subtilitatibus, quodlibet. Scho-
ti, tum involutis scholarum laqueis ac stul-
tis calliditatibus, constanti animo, germa-
na Oratione, rebus fæcundissimis, Dei
gloriam disseminant, regnorum honorem
conservant, Doctrinarum sacra promul-
gant, populorum saluti invigilant. O
egregia Juventus! O studiosi! no-
tate has simplices lineas, ex interi-
ori affectu hoc loco signatas. Nam
ut nulla orbis plaga est, quæ non
aliquid boni generat, sic nullum in-
genium adeo desertum invenitur,
quod non aliqua dote ornatum est.
Ille ad Theologiam, hic ad jurispru-
dentiam, iste ad Medicinam; alias
ad Philosophiam, ad Historiam, ad
Elogia condenda, ad Orationem, de-
niq; ad ipsa Poësin inclinat. Et in his,
ad Elegias alij, nonnulli ad Epigramata
incitantur: summa huc redit; ponderet
qvilibet naturæ præstantiam & quo
toto

toto impetu feratur, excolendi de-
inde isti igniculi, ut feliciter in flam-
mas surgant, ardeantque clarissimè.

CAPUT SEXTUM.

EXEMPLIS CONFIRMAT PRÆCEPTA, SUPERIORI CAPITE TRADITA.

§. I. Ut in Naturali scientia vana est præ-
ceptionum moles, nisi roboretur solida
experientia: sic ineptum foret, ea præ-
cepta circa stylum epistolarem dedisse,
quae evidentibus exemplis non possunt
firmari. Cape ergo schemata Epistola-
rum Theologicarum, scriptarum olim
à Luthero.

Utriusque formam legere potes
apud Sleidanum, circa initia
libri sexti. Particulas excerpti-
mus istas, In literis ad Regem An-
gliæ, observationem merentur
hæc: *Doctrinæ suæ caput illud esse; quem-
admodum fide per Christum nos oportet
fieri salvos, qui nostrorum scelerum
paenam*

pœnam collo, cervicibus & corpore suo ro-
to sustinuit, qui pro nobis mortuus ac
resuscitatus, cum patre in sempiternum
regnat. Hanc esse Prophetarum & Apo-
stolorum omnium doctrinam: Eo posito
fundamento, docere se, que sine charita-
tis officia, quid invicem nos oporteat alte-
ri præstare, quomodo sit obediendum ma-
gistratui, & Evangelicæ professioni omnis
accomodanda vita. si quid in ea doctrina
sit impietatis & erroris; cur eum non de-
monstrant adversarii? cur se nec auditum,
nec invictum damnent atq; proscribant.
Quod pontificatum Romanum & ipsius
omnem clientelam reprehendat, eo face-
re, quod illi diversum à Christo & ab A-
postolis doceant, questus & emolumenti
causa, quo videlicet omnibus religuis im-
perent, & in summis deliciis belluentur:
Adhunc enim scopum cogitationes illorum
omnes atq; facta dirigi. hoc etiam vul-
go sic esse notum atq; testatum, ut nec i-
psi quidem negare possint.

Quod

Quod si mores emandarent, nec alieno
cum dispendio & injuria, vitam hanc du-
cerent ignavam atq; turpem, facile pos-
se dissidium sedari. Germaniae Principibus
ac civitatibus non paucis dogmata sua pro-
bari, qui beneficium hoc Dei reverenter
agnoscant: cupere se plurimum, ut &
ipse in eo numero censemur: quod vero
Cæsar & quidam alij contra se moliantur
non esse novum. Davidem multis ante
seculis prænunciasse, futurum, ut reges
atq; populi contra Dominum & Christum
varia meditentur, & imperium ejus pro-
jiciant: sibi quidem ad ejusmodi scriptu-
re loca respicienti, mirum etiam videri
ullum esse Principem, qui faveat Evan-
gelii doctrinæ. Vide jam, ô corda-
te lector! quam solidum primo po-
nit suæ religionis fundamentum;
quod sane in hunc usq; diem, distur-
bare nequaquam potuerunt infero-
rum portæ, & rabies tot furentium
hominum. Deinde religionis pon-

tificiæ scopum evidentèr ob oculos ponit; monstratque eum pugnare contra verbum Dei, contra dogmata Christi, in carnali luxuria & ineptis ceremoniis tantum consistere. Tandem sibi gratulatur; quod ejus doctrinæ placeat omnibus cordatis, adeoq; non mirum Diabolum cum sua secta in Christum insurgere, cum ista jam sint dudum prædicta, in collegio sanctorum. Extat & alia Lutheri Epistola ad Georgium Saxoniæ Principē; in hæc verba concepta. Sese exacerbari magis atque magis, hancq; esse causam cur nunc ad ipsum scribat. Orare vehementer ut suam doctrinam oppugnare desistat, non quidem sui causa, cui præter vitam nihil auferri possit: sed ipsius potissimum gratia, cujus in eo versatur salus. cum enim certò sciat, doctrinam suam consentire Prophetarum & Apostolorum scriptis, ideo se magnopere de ipso, qui tam acerbe illam oderit & persecutur, sollicitum esse. Monet etiam ne

ad suæ personæ tenuitatem respiciat. Non enim suum hoc esse negotium, sed omnipotentis Dei: licet omnes fremant & indignentur, permansurum eam esse doctrinam in sempiternum: ecque magis dolere sibi, quod ipsum ita tumultuari videat & impingere. Stationem hanc non se posse deserere, & quoniam ipsi alioqui gratificari cupiat, orare, ut sibi ignoreat, quod durius quædam in ipsum dixerit: se vicissim præcaturum esse Deum, ut ipse culpam omnem contempti & afficti Evangelii condonet: neque dubitare, quin sit exortatus, modo ipse desistat ab incepto, neque lumen illud, orbi terrarum accensum beneficio Dei, conetur extingvere. Nam si pergit ita sævire, imploraturum se gratiam & auxilium Dei contra ipsum; atque ita fore, ut serò tandem intelligat, quid sit, velle Maiestatem Divinam oppugnare: fidem enim habere se firmam & indubitatam promissionibus Divinis, atque ita sentire suam orationem esse potentiorēm omnibus artibus & insidiis Diaboli; ad eam quoque se perpetuo confugere, tanquam munitionem propugnaculum & arcem.

Proh fidem prudentium! quanta
gravitate heic insurgit; quanta con-
fidentia pro Deo & vera religione
pugnat; qvanta animositate meticu-
losum & oscitantem Ducis animum
excitat & reprehendit; quanta de-
nique perseverantia pro Dei Maje-
state vigilat, ille Theologorum A-
quila, ille Doctorum Sol, illud orbis
miraculum, ille Cœlestis Angelus
volans per æthera, cum æterno E-
vangelio.

**§. 2. Exempla Epistolarum Politicarum
tria damus, HEROICUM, CIVILE,
DOCTRINALE.**

Primum illud, sive Heroicum, a-
pud Curtium invenies, lib. 4. c. 1. isto
fili diductum. Alexander Dario.
Ille cuius nomen sumpsisti Darius, Grecos,
qui oram Hellesponti tenent, coloniasque
Græcorum Ionias, omni clade vastavit,
cum magno deinde exercitu mare trajecit,
illato Græcia & Macedonia bello. Rursus
Rex

Rex Xerxes gentis ejusdem, ad oppugnandas nos, cum immanium barbarorum copijs venit, qui navalij prelio victus, Mardonium tamen reliquit in Grecia, ut absens quoq; popularetur urbes, agros ureret. Philippum vero parentem meum, quis ignorat ab his imperfectum esse, quos ingentis pecuniae spe sollicitaverant vestri. Impia bella suscipitis, & cum habetis arma, licitamini Hostium capita. Sicut Tu proxime talentis mille, tanti exercitus Rex, percussorem in me emere voluisti. Repello igitur bellum, non infero. Et Dijs quoq; pro meliori stantibus causa, magnam Asie partem in ditionem redegi meam, te ipsum acie vici: Quem etsi nihil à me impetrare oportebat quod petieras, tamen si veneris supplex & matrem, & conjugem, & liberos sine pretio recepturum te esse promitto. Et vincere, & consulere vietis scio. Quod si te nobis committere times, dabimus fidem, impune venturum. De cetero, cum mibi scribis memento, non solum

Regi Te, sed etiam tuo, scribere. En specimen Generosissimi ingenii! Illaborata videntur omnia, sed pariter gravissima. Enumerat primò injurias confæderatis Civitatibus Græcorum, Patri, sibi denique ipsi, illatas; Mox triumphat, de maxima Asiae parte, sibi, armorum vi, subiecta, idque ut retundat superbiam Darii. Statim infundit oleum, *si veneficis supplex.* Denique conversis vestigiis imperat & mandat, ut memor sit in posterum, *sc. non Regi, sed orbis terrarum Monarchæ,* scripsisse. Cæterum schema civilis Epistolæ, etiam annextere placet: & quamvis liber decimus Plinii Secundi, his abundant; duo tamen exemplaria annotabo; prius continet Plinii consultationem apud Trajanum, de Adjectione civium, hoc modo: Lege, Domine, Pompeia, permissum Bithynicis civitatibus, adscribere sibi quos wellent

vellent cives, dum civitatis non sunt alienæ, sed suarum quisque civitatum quæ sunt
 in Bithynia. Eadem lege sancitur, quibus
 de causis è senatu à censoribus ejiciantur,
 inter quas nihil de cive alieno cavetur;
 hi de me quidem ex censoribus consulen-
 dū putaverunt, an ejicere deberent eum, qui
 esset alterius civitatis? Ego quia lex sicut
 adscribi cīvem alienum vetabat, ita ciīci
 è senatu ob hanc causam non jubebat: Præ-
 terea quia aliquibus affirmabatur mihi,
 in omni civitate plurimos esse bulentas, sc.
 senatores ex aliis civitatibus, futurumque
 ut multi homines multæque civitates con-
 cuterent ea parte legis, qua jam pri-
 dem consensu quondam exolevisset neces-
 sarium existimavi consulere Te, quid ser-
 vandum putares. Candidissime per-
 contatur pectus ingenuum, quid de
 adjectione Civium sentiet Impera-
 tor: Cui mox breviter & regiè re-
 spondet Trajanus. Merito bæsti, Se-
 cunde charissime, quid à Te respondi o-
 porteret censoribus consulentibus, ac le-
 gerent in senatum aliarum civitatum, ejus-

dem tamen provinciae cives? nam et legis auctoritas et longa consuetudo usurpata contra legem, in diversum movere Tem potuit. Mibi hoc tempetamentum ejus placuit, ut ex præterito nihil novaremus. Sed manerent quamvis contra legem ad sciti quarumcunq; Civitatum cives: in futurum autem, lex Pompeia observaretur, cuius vim si retro quoq; velimus custodire, multa necesse est perturbari. Jam quoq; exemplum Epistolæ doctrinalis subjungimus. Nam cum ingenia illustria, Invidiæ telis semper subjaceant, vocibusq; male feriatorum appetantur, necessum est, ut communiant se adversus iniqva temporum; tum hominum, inscitiam & malitiam pari ubique tumultuantium. Atque ut intelligatur Invidiæ indoles, ad ea, quæ doctè commentatus est in suis fidelibus sermonibus Verulamius Baco, adde epistolam Antonii de Guevara, de latè pa-

ten-

tente invidiæ regno, hōc modo adornata:

Scribis vehementer te irasci invidis quibusdam, omnia à te dicta aut facta calumniantibus. Evidē quod molestè id fers ignoscendum tibi puto: quod irasceris, minus recte te facere existimō. *Multo satius est invidiam hominum quam misericordiam experiri.* Omnia vitiorum vestissimum est *invidia*: de qua primi homines questi sunt & ultimi eciam sub fine mundi querentur. Idem enim, mihi crede, *invidia & Mundi finis erit.* Inter Eym & Serpentem, Abelem & Cainum, Iacobum & Esavum, Iosephum & Fratres, Davidem & Saulem, Iobum & Sathanam, Achitophelem & Busum, Amonem & Mardochaeum dissidia & Ictidias quid aliud nisi *invidia* excitavit? Multo capitalior illa est *invidia*, quam quæ ex despectu & contumelia promanat; at *invidia* ne excitio quidem explicetur. Gravius longe & diutius bellum fuit inter Romanos & Pœnos, quam inter Græcos & Troianos, hoc enim, ex Helenæ raptu, *contumelia*; Illud, imperii *emulatio* accederat. Quid funestum

sum illud inter Pompeium & Cæsatem
 bellum conflavit nisi Invidia? quod scilicet
 alter patrem, alter priorem ferre non
 posset, & Pompeius Cœsaris felicitati; Cœ-
 sar Pompeii auctoritati & magnitudini in-
 viderit. Pauci, meo iudicio, sunt, quæ o-
 mnia vitia habeant; sed Pauciores qui o-
 mnibus careant. Probo invidetur; impro-
 bus aliis invidet: sicut vitium hoc vix quis-
 quam effugere possit, dum eo vel alios in-
 festat, vel ab aliis infestatur A
 Mendaci cavere tibi potes, si cum
 eo nihil loquaris; A superbo, si lu-
 bens ei cesseris; ab ignavo si contemnas,
 à gulo & lurcone, si mensam eius fugias;
 ab Iracundo, si à iurgio abstineas; ab a-
 varo, si nihil ab eo petas: at invidiam ut-
 cumq; fugias, nunquam tamen effugies,
 immo quanto magis illam fugeris, tanto
 acerius te persequetur. Nulla arx tam mu-
 nita est in quam non introrumpat; nul-
 lis tam excelsus murus, quem non trans-
 cendat; nulli tam profundi cuniculi ad
 quos non penetret, nulla tanta potentia
 cui non se se obiiciat; nullus homo quem
 non invadere ausit. Esto; in uno homine
 omnia hæc insint, forma Absolonis, Salo-
 monis sapientia, Azaelis agilitas, Cræsi opu-
 len-

lenta; facundia Ciceronis Iulii Cæsaris
 felicitas; Traiani iustitia & quid non? Ve-
 re dico, quanto plures & Maiores in ipso
 dotes agnoscentur, tanto pluribus & vali-
 dioribus Invidiæ telis impetetur. Lupus
 pecori insidiatur; Corvi cadavera sectantur;
 apes flores circumvolitant & populantur,
 homines peccuniam & opes querunt; In-
 vidia felicitatis est Comes. Est enim natura
 fere ita comparatum, ut quemadmodum
 miseris & afflictis condoleamus, ita fortuna-
 tis invideamus. Non cicutæ Socratis sed
 virtuti non Ciceronis exilio sed Eloqventiæ;
 non Pompeii fuga & cladi sed immaturis ho-
 noribus & magnitudini; non Catonis quo
 se transfixit gladio sed constantiæ, non
 furæ Polycratis sed perpetuæ felicitati, non
 Cœsaris vulneribus sed dominationi quis-
 quam invidet. In eo mirum est quam se
 humani animi prodat malitia, qvod pauci
 sunt qui afflitos sublevent; at multi qui
 suos ipsorum amicos deiicere studeant &
 proculare. Qvisquis es, quantumcumq;
 felix ne tibi unquam persuade majorem ad
 tuas opes quam ad vicinorum Invidiam fo-
 re accessionem. Ecquid Didace huic tu-

qva-

que Invidiæ collegio seu fraternitati nomen dare cupis? Age sis, appende libræ ceram,
& in societatem hanc venire ne recusa, in
qua fideles & infideles, præsentes & absen-
tes, divites & pauperes, vivi & mortui re-
periuntur. Invidiorum præcipuum munus
vivos sepilire & exhumare sepultos. Quæ
privilegia ipsorum sint & consuetudines,
quæris? Aliqvt accipe. Non illis in facel-
lo aut alio certo loco condicetus aut status
est conventus sed domi suæ desidentes, aut
ubicumq; deprehensi sacris deæ suæ ope-
rantur. Non pauperibus illi, sed divitibus
dentem impingunt: non prosunt, sed no-
cent; non dant sed rapiunt; non benè sed
malè precantur, non hostes sed amicos ul-
ciscuntur. Verbo dicam, hoc illis peculiare
est, ut nec alter alterum ferre, nec inter se
nec apud alios verum dicere possit. Qvam-
vis autem alicui forte disPLICERE hæc possit
fraternitas. Qvamvis autem fraterni-
tas hæc sive societas, ob multas qvas
habet molestias, merito alicui disPLICERE
possit: mihi tamen crede, miser est, quis-
quis in eam non adscribitur. Quem enim
invidia præterit, eum certum est à fortuna
qvoq; negligi ac præteriti Themistoclem
ferunt

ferunt rogatum aliquando. Ecquid tristis
esset, respondisse, eò quod id ætatis nihil
dum gessi civium meorum invidia di-
gnum. Siciliam pessimi tyranni fere con-
tinua serie male habuerunt: adeo ut ne-
seiam utrum ob septem suos, quos produ-
xit sapientes, beatior Græcia; an ob tot
quas passa est tyrannos infelicior Sicilia
habenda sit. Ex iis unus moriens filium
monuisse dicitur daret operam, si beatus
esse vellet; ut ipse nemini sed omnes ipsi
inviderent. Non tyranno, sed sapientissi-
mo viro digna hæc vox est. Id enim vo-
luit virtutem summo studio sectandam
sed vitia fugienda esse. Ex his opinor in-
telligis causam tibi nullam esse ut alio-
rum invidia doleas: multorum quæ præ-
stare ut illa te seqvatur, quam felicitas te
fugiat, aut tu, cuius illa utriusque co-
mes est, virtutem deseras, aut ab illa de-
seraris. Novarum rerum hic nihil est,
nisi hoc scire tua interest, quemadmo-
dum apud vos Invidia regnum tenet, ita
calumnandi & maledicendi libidinem
adeo tyrannicè apud nos grassatur, ut nec
Regi, immo nec ipsi Deo pacat; Vale.

§. 3. Ex pomposis adducemus fragmentum ex dedicatoria Viri sapientis, bonarum literarum fautoris maximizatum Kircheri ad regem Hispanie; denique consolatoriam quandam.

Eum Principem ad perfugium amat Philosophia, in cuius sinu presidioq; latere secure, lucere clare, pugnare fortiter, quiescere cum dignitate possit: Commodo igitur sese nostra recipit in Illum quem sustinet nobilitas, pietas firmat, ambient laurea, coronant palmae, virtus tegit; adeo ut quod ad firmamentum stabile, quod optant alii ad ornamentum illustre, quod amplum ad victoriae spem aut securitatis, illius non patiatur dignitas desiderari, quo me singularis humanitas advocavit. Ut rem tamen aperiam ingenuè, non tam ut vincat quod est cupiditatis, quam illius dicata obsequio serviat, quod est officii, nostra ad illum Philosophia accedit. Venit traditura quod debet, non petitura quid non mereturna-
bita

naturæ legibus obtemperat, non ambitionis; hanc enim audire meum, istam implere illius potestatis est; non legis; quamquam dum accipit, quod offert mea servitas, facit quod postulat cupiditas. Ut enim philosophia nihil majus à me exigere potest, ita neq; illa optare quidquam honorificentius, quam ut in illius sinu longis defuncta laboribus & periculis conquiescat. Optandum sane, ut singula hæc verba, aureis & æternitatis stylo insculpta essent omnium Regum, Principum, & Magnatum mentibus; tunc haud dubiè feliciori amplexu manus jungerent pax, candor, fidelitas. Sequitur nunc Athanafii Kircherii dedicatoria, Arcæ Nœmiciæ scrutinio præmissa, qvæ ita sonat.

Arcam sisto Tibi, Rex Maxime, arcam dico, non Pandoræ fanaticis Deorum muneribus locupletatam, non Mausoli Regis opibus cimeliisq; confertam, non Crassi inexhaustis opulentam Thesauris, cete-

rasq; haud absimiles, quas suis affinxit
 Regibus fabulosa antiquitas; Sed Arcam,
 qua quicquam Mundus, non vidit gran-
 dius; Divinus nibil, nihil Mortalium
 admiratione dignius, cuius Architectus
 fuit Deus Opt. Max. Nœ faber, Moses
 interpres: quam deinde omnium seculo-
 rum scriptores, qua sacri, qua profani,
 secundo calamorum profluvio immensis
 laudibus toti divulgarunt posteritati. Nos-
 se vis hujus Arcæ Epigraphen? Illa est
 mundi miraculum, Geocosmi compendium,
 totius viventis sentientisq; Naturæ semi-
 narium, pereuntis mundi asylum, re-
 nascientis felix fortunatumq; auspicium.
 Hanc ego, omni qva possum submissæ
 animi contestatione ante sublime Majesta-
 tis Tue solium supplex & venerabundus
 depono, veluti Monarchie Tue; qua patet
 Orbis universus longè latequè exorrectæ
 absolutum omnibus numeris prototypon:
 Operum prægrandium munera non nisi
 supremos in Orbe Monarchas, quorum

Tu inter paucos singularis Es unus es, apprime congruunt. Si enim Monarchiae Tuae amplitudinem exactiori trutina pondero, rem Orbi forsan paradoxam, attamen omni subducto dubio verissimam proponam; Monarchiae inquam Tuae, cui sol nunquam occidit, Monarchiae quae stellas & sidera, veluti signaculo quodam claudit & aperit, nunquam & nusquam deficiente luminis splendore. Nam ut recte quidam:

Quocunque diem Sol Orbe reducat
Felix obit Tua Regna; tuo se aureus
offert

Oceano, conditq; tuo; cui subdita parent
Imperia Astrorumq; Orbis, totumq; quod
usquam est

Regales intra sedes, & limina cernis

Monarchie Tuae cui Oriens & Occidens,
Polus alter & alter, nox diesque quolibet
temporis momento, alicubi semper jucundo
fuedere junguntur in unum; Aestas
cum Hyeme, cum Autumno Ver, singula
cum omnibus & singulis exacta equita-

G tis

tis & Justitia sua jura excereent; atq; adeò Æstatem hic torridam, alibi horridam brumam, justi ponderis equilibria Tua in Monarchia experiaris; Nunquam Tibi recentes Violæ, Rose, Lilia cessant suum spirare odorem, fructuum peregrini cœli cupidiae, Tuæ nunquam desunt Mensæ. Noë veluti in Zootropheo quodam omnes quæ cœli ambitu continentur, animantium species sue conclusit Arca; Verum enim vero quæ Noë strictiss, Tu Rex Summe in Tua Monarchia sparsim tenes. Si deniq; Opum Divitiarumq; ubertatem penitus expendo, Tibi sunt aurei sine fundo montes, Argentei sine termino colles, uti recte Poëta non nemo:

- - - Tibi vicitus subdidit Afer,
Littora; Te metuit Ganges; tibi turbidus
Indus

Volvit opes; uni Americae tibi viscera pandit
Fœta auro, quo semoti confinia Mundi
Non cessas ditare Tuo.

Quensis probe expensis, sanctè jam affirmare ausim, nihil in antecedentium tempo-
rum

rum Historiis quidpiam aut Monarchia
 Tuapotentius, aut amplitudine diffusius,
 aut opum immensitate grandius, verbo,
 Divine Dominationi (si ita loqui fas sit)
 proprius observatum fuisse. Hanc Tibi
 granditatem incomparabilem Majores Tui
 fortium gestorum Heroës Ferdinandi,
 Caroli, Philippi & Cæsares & Reges stu-
 pente Mundo pepererunt. Quid enim
 ab Orbe Condito Munto inlaruisse dici
 potest, quam novos & nè fama quidem
 notos detexisse Mundos, nova novis ad-
 jecisse Regnis, Orientem Occidentemque
 Austrum & Aquilonem Tuæ se fecisse pote-
 statis; & quod omnibus excellentius est
 incredibili Divina gloriæ studio acquisi-
 torum potentiam Regnum DEO Opt.
 Max. subditam in ovilis augmentum &
 amplitudinem Christo subjugasse, tanto
 per Orbem Terrarum animarum & fru-
 ctu & lucro, quantum non dicam sperare
 sed ne credere quisquam sibi persuadere
 potuisset. Quorum quidem omnium Tu

Rex Maxime ex alto Heroum sanguine
 prognatus & Princeps, & Heres minime
 degener; cum Talia de Te efflorescentium
 in tantilla estate virtutum Specimina jam
 dudum dederis, ut extra communem
 hominum sortem, spiritus Heroicos vel ex
 ipso Magnæ & Augustæ Matris Tuæ lacte
 suxisse videaris, Matris inquam ANNÆ
 serenissimæ Reginæ, Parentis Tuæ qui
 pari felicitate ex præcelsa Austriacorum
 Cæsarum profapia exorta, etiamnum Or-
 ba & Regni & thori conjugæ, magnis ta-
 men & grandibus rebus intenta in tanta
 exultatione temporum hostiumq; ma-
 chinis, cogitationi fæminei masculum in-
 dens animum quanto se Sola ingenij robo-
 re, quanto consilio, prudentia ac Religio-
 nis ardore, in administranda Monarchia
 se gesserit, orbis novit & obstuuit. Haec
 imparem rerum gerendarum telam Tu-
 ordiri videris Rex Maxime, dum de vi-
 vida indolis Tuæ letitia, de matura in-
 tenello corpusculo prudentia, de præcoci-

ani.

animi fortitudine, verumq; recte agenda-
rum dexteritate, de Te quidpiam huma-
na sorte altius Mundus sibi polliceatur,
atq; adeo thema paulatim dictare incipi-
as, quod acerrima Historicorum ingenia
quandoq; sit defatigatum. Quæ quidem
uti summa admiratione celebrare non se-
mel audivi, ita quoq; nescio, quo felici o-
mine isthuc Monumentum veluti gloriæ
Tuæ prodromum gloriosi Nominis Tui
immortalitati consecrandum censui Cedro
perennius;

Quod non imber edax neq; Aquilo impo-
tens

Possit diruere aut innumerabilis
Annorum series & fuga temporum.

Vale Rex Maxime Augustæ Domus & Or-
bis delicium, vive in spem magnam Deo
Regnis, Religioni Catholicae, Tibi.

Nonne jam, ex florida hujus de-
dicatoriæ Eloquentia, nervis, acu-
minibus, complexiūq; rerum, men-
te concipere potes, vera esse ea, quæ
supe-

superius, de facie pomposarum Epistolarum, diximus. Tandem CONSOLATORIAM quoq; addimus, olim ad eruditissimū amicū transmissam.

Si qvalicunq; sermonis genere lenite possem illam doloris magnitudinem, quam ex optimi filii discessu nuper acceperas Parens; Sanè vero officium illud libenter susciperem, nisi ejusdem lactus acerbitas me pariter involveret, confunderr t, & ferē non d jiceret : utpote cui magna ex parte notæ erant adolescentis vigor, primitiæ judicii, & honestarum rerum amor. Interea tamen, cum jam ad illa loca delatum sit tam charum pignus , ubi non tantum ardor & studium perficiuntur, pietas & virtutes ceteræ præmium habent; verum etiam vivere incipit, postquam mortem cum vera vita commutavit ; nostrum esse arbitror, casum hunc, moderatè ferre, & in contemplationem paulò altiore aciem mentis intendere. Qvando vulgares illas & noxias plantulas tempestas vehementior rapit, nullas causas habet hortulanus cur magnoperè dolat, utpote

potè quæ ad quemlibet cespitem & ubi q;
 locorum crescunt; at prætiosa herbarum
 dum vel ætas adurit, aut humor suffocat,
 vel frigus enecat, meritò tunc angi debet
 animo, quia totius anni & tantorum fru-
 ctuum jam pergit expectatio. Eodem feré
 modo, qvando vulgaria cadunt mancipia,
 sive voluptatis illa fuerint, sive divitiarum,
 sive honorum sibi nunquam competenti-
 um; talium manibus nemo ingemiscit; qvo-
 niam illa secta in prolixam seriem patet,
 & natos habet natorum, tum & eos qui
 nascuntur ab illis. Sed cum mortis vehe-
 mentia in germina, de quibus bona fo-
 ventur auguria, debacchatur; tum vero lu-
 gent qui plantarunt, gemit virtus, lachry-
 mas emitit publicus rerum status; quasi
 intelligat perire suum florem, sua gaudia,
 suam gloriam. Quid nunc multis voca-
 bulis incipiam describere caducas rerum
 humanarum mutationes? hæ enim ambo-
 bus nobis multò accuratius notæ sunt,
 quam iis, qui omnes suas actiones vol-
 vunt inter valdè stabiles polos, *speculum*
nimirum & pectinem, & intereatot somni-
 ant deliria, tot fingunt aureos montes,

tot

tot imaginaria decircinant miracula, quot
vix capere potest orbis alter & alter. Hi
profecto in ipsa fragilitate æternitatem si-
bi figurant; Nos vero simpliciter judica-
mus ipsa mundielementa, è quibus omnia,
tam cœlestia quam sublunaria sunt com-
posita, ob qualitatum discordiam, ad istam
metam continuò pugnando properare, ut
simul moriantur. Dierum Rex, SOL ille,
noctem per vices admittit, tanquam testa-
tricem suum aureum jubar obfuscari pos-
se: & qvamvis identidem nobis gratula-
mur de tanti fulgoris splendore, dum ab
ortu in occasum magno ignium comitatu
amicus ambulat; erit tamen punctum,
quo immensa illa claritas resolvetur in il-
las tenebras, quæ nunquam illustrari pos-
sunt. Luna noctis regina cum universo
stellarum choro, jam abit, jam reddit, jam
adparet, jam senescit: quibus Ianè vicissi-
tudinibus, cœlestium corporum vanita-
tem constantissimâ inconstantiam enarrant.
Nec sua prælia omittunt annorum tempo-
ra, vernalem gratiam interturbat æstatis fer-
vor, eum rursus difflat autumni horror,
qvem iterum confieit hyemis rigor: omnes

vero

vero discordi concordia canunt, *nihil quidquam est stabile.* Animalia quæ silvas
 pererrant, vel aquas inhabitant, aut alias
 per æthera volant, continuo ortu & oc-
 casu nobis nostra fata ob oculos ponunt.
 Omnis camporum gratia, omnis arborum
 honor, omnes plantarum deliciæ, tripu-
 diante cœlo, folia expandunt, flores ex-
 plicant, dulciq; balsamo aëta replent. At
 vero dum cadunt simbi, dum ruunt gran-
 dines, dum furit ventorum boreas, in ci-
 neres fatiscit illa pompa, iste tot savita-
 tum apparatus, Datur liquor quo mol-
 lescit adamas; datur vermis qui aurum te-
 rebrat; datur pulvis qui ferrum rodit; da-
 tur hostis, qui vehementi clade saxa &
 montes scindit & comminuit. Nos ho-
 mines, quibus in omnia imperium con-
 cessum est, qui acri judicio terrarum sa-
 cra & oceani evolvimus miracula, qvi stel-
 larum notamus motus, conjugia, effectus;
 qui orbem disponimus, & sancta æterni-
 tatis mysteria piè meditamur; nos inquam,
 eodem die quo nascimur, sinistra manu
 vanitatem salutamus & amplectimur, de-
 xtram vero morti portigimus, illudque

Gf foedus

tœdus cum eo pangimus, quolibet momen-
to ejus seqvi imperia. Cujus quoque ma-
gna est & auctoritas, & gravitas, & furor.
Non occæcare valet ejus grandævos ocu-
los sceptrorum fulgor, non terret gene-
rositatem illius clava Herculis, vel Xer-
xis numerosa gentium unda; Principum
mandata, Theologorum minas, Juris con-
sultorum rescripta, Medicorum remedia,
Oratorum facundiam, Poëtarum cantica,
æquè ac pauperum abjectam conditionem,
ridet, spernit, conculcat. Proinde cum
tam rigida sit fatorum lex, ut velut ma-
gnes omnia trahat ad mortis metam, æ-
què videtur naturale parentes amittere fi-
lios, ac natos genitoribus orbari; quoni-
am debitum hoc ex æquo omnes mor-
tales obligat. Itaque O Parens, quod tibi
jam, id mihi propediem contingere potest.
Deus vita & mortis præses, nunc hunc,
nunc alium, mox me, & aliquando Te ad
sua invitabit palatia; hic enim est finis u-
niversæ peregrinationis, revertendum est
in patriam. Jactatrix Stoicorum secta
nullius hominis animum angi debere in
vulne-

vulnere doméstico arroganter satis decla-
mitat; quoniam dolor, nec decet sapientem,
nec ipse est utilis. Non fero judicium de
illa tam grandi magniloquentia, cum ma-
gis haud dubiè ambobus nobis placeat
Principis Hebræorum & sanum & admi-
rabile exemplum. Cui postquam nunci-
atum est filium: quem summè diligebat,
diem obiisse supremum, exorrecta fron-
te, latus & unctus ad Epulas accessit, ala-
cri subinde sermone reptens, *nullis lachri-
mis revocari amplius potest, nos vero ad
illum brevi properabimus.* Sanè vero Am-
plissime Domine, idem Te & facturum &
dicturum arbitror, dum sincerè cogitas,
quot mala mature evasit Tuus tam dile-
ctus DANIEL, & qvanta bona jam occu-
pavit. Novi quidem Te ipsum ex pruden-
tiæ illa qua abundas copia, notitiâ histo-
riæ, prolixa peregrinatione & accurata
praxi, dudum mundi habitudinem nota-
sse; interim tamen quoniam cæpi tecum
colloqui, placet fingere nos in medio cœ-
li & terrarum ab omni corporis pondere
liberos ambulare, indeqve prospicere intra
tellu-

telluris ludibria', supra vero æternitatis gaudia, quæ fide alias, per divinam gratiam, quotidie attingimus. In isto obscuro globulo, aquis maximam partem circumfuso, cernere licebit tot casus, tot miserias, tot luctus, tot deliria, tot molimina, tot nugas mortalium; adde tacitam invidiam, quam unus alterum & singuli omnes conficiunt; adde malorum probria & perseciones, quibus homines se invicem vexant & dilacerant; adde genera morborum varia & timorem mortis, quem tamen nulla effugit mortalitas. Rursus si elevare volumus oculos ad domum Dei, ad Angelorum sedes, ad sanctorum animarum candida collegia. Ibi demum est vera civitas, quam interius illustrat Numinis gloria Majestas, inhabitat Salvatoris Christi immaculata sanctitas, circumfulget Sanctissimi Spiritus ineffabilis puritas. adstant Prophetarum & Apostolorum ordines, Martyrum chori & confessorum beata agmina, quæ assiduis praecibus cantillant, Sanctus, Sanctus, Sanctus, Deus Zebaeb. Extra vero adparet symbo-

lum admirabile : ab iis qui hue intrant,
 absterget Deus omnes lachrymas, Et mors
 ultra non erit, neq; luctus, neq; clamor,
 neq; dolor erit ultra. Olim gentes bar-
 baræ nascentes lamentis, exeuntes è vita
 gratulationibus excipere solebant, & ta-
 men cum ipsis hinc esset a beundum pror-
 sus ignorabant quo tenderent. absit ut vin-
 cat nos paganorum vanitas, ut potè qvi-
 bus accuratè notum est, relinquenda esse
 hæc somnia & permanendum omnino in
 perpetuis vigiliis. Itaque tanto beator
 Tuus FILIUS, quo in tanca currentium fe-
 stinatione metam attigit prius, eamq; fe-
 licissimam, quia Deus qui summe bonus
 est, non patitur suos electos hisce fodi-
 bus diu inquinari. Sed forte nos aliter
 & quidem ita judicamus ; qui septendecim
 vivendo annos vix implevit, potuisset o-
 ctoagesimum attingere , sicque senili e-
 logio illustrati. Benè; si interea non o-
 ctoginta millies millena millia malorum
 exauriret illiada, quæ regina mundi V A-
 NITAS indies nobis propinat, & tantum non
 inebriat, Priscis temporibus fatemur sapi-
 enti-

entiam, illam honesti naturalis & boni publici Dominam Senum pectora inhabitaſſe; ſed jam cum videt ſuum numen a quibusdam per avaritiam expelli, per ineptias extirpari, per jurgia lites & ſcurribus jocos contemni, volvavit in animos adolescentum, cum quibus prius vult extingvi, quam pervenire ad illos annos, quos didicit, paſſione, ignorantia, ſimpli- ci, ſuperbiā, tam aureum decus laedere. Ferunt ad Ponti ripas naſci animalia, quae ad lucis ortum incipiunt vivere, ante meridiem occumbunt, circa vesperam ne ciniſ quidem adparet, interea tamen perfecti animalis vitam vixerunt. Felix ille in cætu hominum, qui claudit fata antequam libido & libertas animum a mente ſegregant. Habet adolescentia magis consumatum hominem quam juventus, quae per libidinem; & virilis, quae per crapulam & ſtultitiam ſe ſæpius tam turpiter dat, ut melius fuiffet plurimis, aut statim periiffe, aut hanc lucem adſpexiſſe nunquam. Crede mihi, volat alacrius ad alta anima a peccati libera, quam illa tanto peccatorum pondere

dere obsepra, quæ sapè ad tartara relabitur. Hæc omnia quæ hactenus enumera-
 vimus, cum bene & recte se habeant: inde
 colligere possumus, moderatè dolere, hu-
 manum quidem esse, sed luctus omnes ma-
 gnâ constantiâ perferre ac pati, heroicum
 judicatur. Viros decent virilia; in quem
 classem cum Te omnino posuit virtus & e-
 ruditio, cave maceres te ob mortem filii,
 quasi & Tuam deplorates futuram necessi-
 tatem, utrumque enim & securum nimis,
 & valde est periculosem. Alexander Magnus
 paucorum militum Dux, cum ex taberna-
 culo prospiceret innumerabilem illam Da-
 rii multitudinem, alaci, voce clamabat;
 tandem per animo meo periculum video.
 Sic & nos dum facto agmine exundant
 livor, meror, mors, hilari voce dicemus:
 nibil haec omnia nocebunt. Pulvillus Ho-
 ratus cum sacra procuraret, tristem ac-
 cepit nuncium filium periisse; curam re-
 ligionis propterea non omisit, sed summâ
 cum alacritate peregit. Fabius maximus
 amissus filio consulari dignitate claro, hi-
 lari fronte prodibat in publicum, ejusque
 memo-

memoriam funebri oratione ampliabat.
 Omitto Pisonum, Scaurorum, Metellorum,
 in simili casu gravitatem, cum & consimili
 exempla hodiernus dies habeat. Si prin-
 ceps aliquis rarissimum speculum tibi com-
 modaret, in quo tuam imaginem exactè
 posses contemplari, & post lustratam
 faciem, cognitumque habitum, si idem
 Rex suum reposceret, nonne protervus
 esses nimis, si cum tanta benigno Mo-
 narcha inciperes contendere. Deus immor-
 talis dedit Tibi filium, pius, modestum,
 morigerum, literarum valde amantem,
 & tibi per omnia similem; Sed eo fi-
 ne, ut repeteret suum quando vellet.
 Cum tanto ergo Numinis Stomachari aut
 profecto aut audax impium foret, Stabit
 ergo quod immutati nequit, DANIEL
 F A X E L mortalium cœtibus extre-
 mum Vale dixit, jamque inter eter-
 nitatis candidatos, Sindone cœlesti a-
 mictus radiat; quem propediem seque-
 mur, videbimus, tangemus manu, &
 osculo charitatis salutabimus. Vale!

§. 4. Familiares Epistolas tres hoc loco addimus, unam integerrimi amici ad me; Tum responsum nostrum; tandem argutulam quandam Plinii.

Prima illa in hæc verba est consignata: Eruditum opus Tuum, quod apud amicum quendam, de Contemplatione Mundi, vidi, tanta me affectit voluptate, quanta solet is affici, cui sors optima contigerit; ac proinde obnoxie peto, ut harum tuarum lucubrationum me facias partipem, in quibus & disputandi subtilitas & multiplex variarum rerum cognitio facile appareat; quorum alterū ingenii alterum diligentiae laudem habet. Et si plures essent tales, non haberent hæc secula, cur inviderent antiquitati. Incumba quoque literas quantum potes à situ recipere, ne nitor ille Romana lingua ac veræ sapientiae, injuria temporum penitus obsolescat; excude semper aliquid novi, quod rem literariam adjuvet & illustret. Et quæ domi habes, fac tandem exeam in

communem utilitatem; atque sic, Te omnino eripies morsibus edacis evi, nomenque Tibi eternum vindicabis. Ego quidem, ut Te ipsum ab incunabulis ferme, ita tua omnia amo atq; maximè desidero. It autem infirmi est animi ac cupidioris petere aliquid, ita facilem præstare se amicis atq; beneficum, libertatis est & benevolentiae singularis. Igitur paucis te bac de recomponculo, nam qui ab amicis quod cupiunt pluribus contendunt, injuriam faciunt amicitia, quasi ipsa non possit quod potest illecebra orationis, necessitudo enim ista sive familiaritas, qva à primis initis nos intercessit, ac simul cum aetate crevit, me voti mei faciet compotem & audaciā excusabit; Etenim si ad præterita ista crepundia nostra mentem revocare libuerit, non pigebit exacti temporis, quod suavem sui reliquit memoriam, à quo hi duo Danieli studi a coluerunt. Deditici pene literas ego iam in tanto hoc à Musis secessu, ut vides

vides, quippe qui dudum Academie vale
dixi, eas tñ. adhuc summopere amo, & nisi
Tecum confirmandæ benevolentiae studium
cogeret, non usq; adeo iam humanitate
ac benignitate Tua abuterer. Sed nunc
bisce Vale. Deum veneror ut nuperrime
hunc ingressum novum annum Tibi sum-
primis, tuisq; singulis, undiquaq; feliciter
decurrere sinat. Saluta singulos quibus
nomen Gyllenstolpii hujus non fastidio
est, præcipue illos quorum laudes eruditio
ornabit, utpote Dominum Falandrum
Tuum Meumq; intimum, & Dominum
Laurbecchium, aliosq; nobis benè cupien-
tes; Et persuavissimum babe, me ad vi-
ta finem, inde sinenter mansurum Tibi, &c.
Huic sic respondebam.

Ex literis Tuis, quas hoc in momento
advexit famulus, id intelligo, Te deside-
rare exemplar Contemplationum Mundi,
quod simplici filo in gratiam nostræ ju-
ventutis non ita pridem emisi. Fateor e-
quidem illud nequaquam tanti faciendum,
quod à tam illustri & eruditō ingenio a-

rog

deo magnificè commendetur , utpote quod
remotis Scholarum nugis , seposita etiam
omni obscura differendi subtilitate , nudè &
candidè mentem meam circa harum re-
rum scrutinium explicat : mentem in-
quam , auctoritate sacra & profana , sen-
suum observatione & aliquali experientia ,
firmatam . Quæ januae sunt haud dubiè
infallibiles , per quas introimur in arcem
veræ scientiæ . Interim tamen quoniā ab
ipsa pueritia , qua nosci & invicem no-
scere potuimus , candorem Tuum perspe-
xerim , ab adulatione longè alienissimum ,
sincerum Tuum judicium , grata mente
accipio , ipsumq; librum jam transmitto à
tam docto pectore ulterius examinandum .
Cœterum an plures ingenjoli fœtus inci-
piam publicare ? vehementer ambigo , præ-
sertim hoc tempore , quo & studia valdè
florent , & judicia sunt ambigua , invidis
deniq; in præclara ingenia immanè quan-
tum grassatur ! scilicet suos ludos exerceat
stultitia , quæ in hac Mundi scena utram-
què paginam complet ; cuius nectar tanto
minus nos ineibriabit , quanto sedulò labo-
ravimus ejus effugere deliria , vel si mo-
destius

destius agamus, ejus ridere ineptias. Illud
vero, coram tam benigno sapientiae æsti-
matore, ingenue fateor: me elaborasse in
iis quæ spectant Professionem meam, O-
ratoriam; Libellum de conscribendis Epi-
stolis; tertium de perfecto Oratore; Pop-
mam de verborum differentiis contraxi
pariter; deniq; cum videam inter tantos
viro, Vossium, Scioppium, Vorstium,
Cellarium, Borrichium, Ticium aliasque
dissidia oborta de lingvæ puritate, & pro-
prietate dictionis, ista tentavi componere
in nostro CRITICO; & sic spero me in u-
sum juventutis sub polo boreo habitantis,
illis, quæ præcepta & observationem deside-
rant, ratione verborum, pro modulo in-
genii mei viam monstrasse. At ratione re-
rum profundior est meditatio; sed ut hac
quoq; in parte lineas primas habent, peten-
tium desideriis dabo propediem Prudenti-
am Civilem cum partibus quæ hanc con-
stituunt, Ethica cuius Radix *jus naturæ;*
Politica cuius mater *jus Gentium*. Hinc
enascitur tanquam truncus, Notitia Imper-
iorum, quem isti ramuli & flores venusta-
bunt, scientia Religionum, Geographia,

Historia, dignitatum & rituum cognitio, & consimilia, quæ manent & manebunt bonarum mentium pabula, pignora, gloriarum templa. Cum v. ab istis negotiis vacat animus, carmine Svetico, Moralia, vitam Josephi & Historiam Regum Gothicorum interpolabo. Habet mediacionem mearum ideam; Jam vero quantum me delectant constantia illa & gravitas, quibus velut sapientissimis symbolis, in memoriam revocas amicitiam illam nostram, quæ cum annis simul adcrevit, brevissimis dici non potest. Macte hac virtute optime virorum! & quem alii premunt & lacerant, & vexant, & mordent, quorum astutiam depictam videbis in libello de ingenio viri civilis; humanitate & fide erige, subleva, anima. Imo, & nunc excusa Epistolæ prolixitatem, quæ nescio quo fato, dum Tecum voluit conloqui, cœpit nimis justo increscere. Vale & semper fave Tuo Danielulo.

Ceterum argutæ familiaris Epistolæ Schema, exhibit Plinius lib. I. Epist. 2. *Olim nullas mihi Epistolas mit-*

tis.

tis. Nihil est inquis quod scribam. At hoc ipsum scribe, nihil esse quod scribas. Vel solum illud, unde incipere priores soleas: si vales bene est, ego valeo. Hoc mihi sufficit. Est enim maximum: ludere me putas? serio peto. Fac sciam quid agas, quod sollicitudine summa nescire non possum, Vale. Heic illud observabit studiosa juventus, acutum scribendi genium, cadere quam maximè in ingenia illustria, candida, svavia, exercitio & eruditione florentissima: qui amant has delicias, inspicere possunt præter Apopthegmata Lycost: Erasmi, Casperi Ens Epidormica, etiam Massenii Argutiarum libros; Attica bellaria Pontani; tum quæ Weizius superconsimile argumentum in sua Oratione & Poësi Politica, satis præclarè adornarunt.

CAPUT SEPTIMUM.

METHODUM FACILIMAM MONSTRAT,
cujus DUCTU HOC ARTIFICIUM GRA-
DATIM ADDISCAT ADO-
LESCENTIA.

§. I. Et primo quidem Adolescentibus propter ingenii imbecillitatem sufficere possunt breves & perspicuae dispositiones; quas, postquam in versionibus & variationibus sunt congrui, ad captum discentium adtemperabunt preceptores: Si nostræ placent, En illarum imagines.

Dispositio Hortatoria, Parentis ad Filium.
Exordium delineabit familiæ optimum statum.

Propositio continebit ipsam adhortationem, ut bonis artibus sedulam navet operam; pietati nimirum, deinde ceteris bonis artibus.

Confirmatio; ab honesto, nihil sublimius

us inveniri in rerum humanarum circulo. Ab *Utili*; nihil utilius quam hiſce annis, dum viget judicium, fervet ingenium, memoria capit, optimas scientias addiscere. *A Jucundo*; magnum fœnus hunc juvenilem laborem excipere; cogitet insuper de expensarum in se factarum magnitudine.

Concluſio voto absolvetur: velit Deus filii charifſimi fortunare studia.

Dispos: Responsoria ad precedentem Horam missarioriam.

Exordium Dicit se ex literis optimi parentis familiæ felicia fata summo animi gaudio percepisse.

Propositio Morigerum animum ad ea quæ ex paterno affectu injunguntur, pietatis & doctrinarum studia, promittet.

Confirmatio addit, se ad tractandas literas naturali impetu ferri, ab utilitate & gloria doctorum stimu-

lari, maximè adhortatione paterna.

Conclusio gratias parenti pro cura
& sollicitudine, tum expensarum co-
pia aget, omnemq; felicitatem fami-
liae adprecabitur.

Dispositio Petitoriae.

Exordium: captanda benevolentia
à beneficiorum frequentia, inde fre-
tus favori pristino, nunc petitum
redire, nec de auxilio dubitare.

Propositio: hic te sacris initiari vel-
le dices, ac ob id rogabis, velit tuus
fautor hoc nomine commodo tuo
inservire apud Antistitem.

Confirmatio: repetendæ modestè ra-
tiones & causæ, quibus sollicitationis
æqvitatem monstrabis; in opiam can-
dide deteges; legitimam ad hoc of-
ficium urgebis vocationem, quod in
oculis cordatorum palmarium es-
se solet..

In Conclusione dices te non dubitare de
promotoris fide in hoc negotio ex-
pe-

expediendo, & promittes nunquam occasiones demerendi velle negligere.

Dispositio Responsoria ad Petitoriam
In Exordio mentionem facias allatarum literarum.

In Proposit: honestæ sollicitationi tuam opem nūq; defuturam dices.
In Confirmatione recensebis varias rationes quæ te in tanti amici favorem trahunt.

In Conclusione amicum valere jubebis, & perpetua amicitia te prosequi rogabis.

Dispositio Suaſorij. (clarabit.
Exordium pro amico sollicitudinē de-
Propositio persuadēbit ut bonos au-
 ctores legat, excerptat, imitetur.

Confirmatio producet argumenta ab utili, necessario, jucundo. à judicio veterum, neglectis his, non perveniri posse in notitiam scriptorum.

Confutatio solvet ea quæ à scholæ filiis obiici solent.

Con-

Conclusio pro viribus contendet ut
persuadeas, & voto quodam claudat,
ut factum feliciter cedat.

Dispos: Responsorie ad suavoriam.

In Exord: Amicum laudabis à fi-
de, cura & benevolentia.

In Propositione isto consilio Te per-
motum ostendes.

In Confirmatione adduces argumen-
ta, per variationem, ad ea, quæ urget
amicus.

Conclusio gratiarum actionem con-
tinebit, tum petitionem, ut amicus in
posterum sibi commendatas res no-
stras habeat.

Dispositione Commendatitiae.

Exordium ab occasione præsentis
status summendum.

Propositio & Confirmatio personam
commendabunt ab ardore emergen-
di è pulvere, à Diligentia, à lectione
& judicio, rogabis etiam ut huic
operam & consilia suppeditet Patro-
nus.

Con-

*Conclusio, in simili casu tua studia
promittet.*

*Responsoria ad Commendatitiam, ex iis-
dem fere locis, argumenta petit.*

*§. 2. Postquam Juventutis spatha fueris
ingressus, tum vero floridior eloquentia
placebit; quam primo ex imitatione, mox
laudationum pomposiori apparatu fa-
cile addisces; ad utrumq; negotium, his
communicamus dispositiones.*

*Imitationum hæ esse possunt deline-
ationes. Primo.*

Ad imitationem descriptionis
Marsyæ, quæ extat apud Curt: lib. 3.
cap. 1. Describatur Aura amnis, quod
oriatur è certis fontibus, quod ter-
ras qvas perambulat fœcundet; qvod
propè Halis præcipitatus in obstan-
tia laxa, magnum edat aquarum
murmur; inde fluens, Urbem hanc
secet, atqve propè arcem in salum
effundatur. Jam undarum color, ri-
parum amoenitas, ejus tumor auctu-
mna-

minalis, & glacierū conflictus tēpore
vernali, & magna utilitas in adportā-
dis mercib⁹, seriē descriptioñis exor-
nabunt. *Secundō.*

Ex occasione verborum quæ ha-
bentur apud eundem auctorem cit:
lib: cap: 2. & 3. institui potest collatio
inter Regis Sveciæ & Daniæ exer-
citum. Danum extolles propter ro-
bur totius Germaniæ & Galliæ, ar-
morum fulgur & novas inventiones,
Ducum undiq; conscriptorum copi-
am, & commeatūs ubertatem. Ubi
ex eadem occasione tangendæ super-
bia Hostis, & jactatrices voces. Sve-
cum laudabis à vigore Regis, Præfe-
ctorum prudentia, patrio milite, ar-
morum non pomposa sed necessaria
abundantia, paupertate virtutis
magistra, Justitia causæ & pietate
Regis. *Tertio.*

Ad imitationem Orationis Ale-
xandri, introducatur CAROLUS
XI, ante pugnam in campis Lun-
den-

densibus, milites hortaturus. Uplandos ob inveteratam virtutem. Smolandos Westgothos & Ostrogothos animabit ad retundendas toties sibi illatas injurias. Finnis Martis pullis campum & hostem monstrabit. Dalecarlos luxuriati Dani intueri jubebit, simulq; monebit Colles asperos montium, cum gaza totius Germaniae & Daniæ, ut jamjam pergant permutare.

Quarto.

Ad imitationem Cap. II. lib. 3. Describatur horribilis pugna Svecorum & Danorum in campis Lundensibus, illustris Danorum fuga & Svecorum Triumphus atq; victoria: quæ fere omnia, ex recenti historia & tabulis geographicis nota sunt.

Quinto.

Fiat Descriptio Aboæ, juxta lineam Curtianam, quæ extat lib. 5.c. I. ubi Babylon depingitur. Hic notari debent Vetustas, situs, amplitudo Civitatis; mox specialius explicabis,

bis, montium circa Oppidum coronam, silvarum amoenitates, camporum spatia, tum ædificia, plateas, foræ. Adde deinde quædam de Templo & Religione; de curiis & justitia; de Academia & Schola, palladiis litterarum.

Sexto.

Cœli instituatur descriptio ex lib: 4. cap. 7. & 12. Nubium ex lib. 4. cap. 3. & 7. Fulguris ex l. 8:cap. 4. Ex omnibus hisce miscebis pulchram picturam ætheris & aëris, quo pacto, nunc serena facie splendet, nunc lugubri ululatu squalens, nunc iracunda rabie terret mortales.

Septimo.

Ex occasione verborum, Curtii quæ habentur lib. 6:cap. 4. & 5. lib. 9: cap. 1. & 5: lib. 4. cap. 9. fiat descrip-
tio Silvarum, Arborum, Camporū;
ex hisce rursus unum Corpus forma-
bis. Si placet exempli gratia, ex
hisce fontibus, depinge insulam
Rundsalu. sitam prope Aboam.

Seqvun-

Sequuntur nunc laudatoriarum Epistola-
rum characteres.

MUNDI PRÆCONIUM si placet, il-
lud elaborabis hoc modo: 1. à magni-
tudine & vastitate immensâ. 2. à pulchri-
tudine globorum, Solis igneo splendore,
Lunæ argenteâ imagine, siderum variabi-
li luce, orbis Terrarum gratia longè ama-
bilissimâ. 3. à varietate rerum, lucis &
umbrarum miraculis; Meteororum nu-
mero & qualitatibus; animalium classibus
& discrepantia; omnium corporum amo-
re & odio, deniq; à diurnitate, harmonia
& concentu partium. 4. monebis homi-
nes venerari & amare tam amplissimæ
machinæ opificem admirabilem.

Deinde LAUS VERIS institui pot-
est 1. ab ingressu Solis in Arietem, quod pa-
cto alta cælorum petit, byemem fugat,
gratosq; ventos cum vernali pluvia addu-
cit. 2. à pratorum coloribus. 3. ab ipsis syl-
varum gaudio, congressibus pecorum,
avium cantu, fabriea nidorum, pullorum
educatione, & amoris vi singulorum pecto-

ra urente. 4. à lusu piscium, vel in aquarum superficie, vel ad littorum brevia, pescationis jucunditate, delectatione auctorii, adeoq; totius naturae rerum inenarrabilis amoenitate.

ÆSTATEM pari diligentia commendabis 1. ab ingressu Solis in Canum; longioris diei jucunditate & brevitate noctis. 2. ab operatione caloris, qui jam agrorum, sylvarum & camporum madorem benignè exsiccat; 3. ab opimâ agrorum messe, gravitate spicarum, crescentium fructuum gratia, luxuriantium herbarum & florum gloria pompa. 4. à nubium in alto volantium phasibus, coloribus, arcu iridis & miti lapsu pluviarum. 5. ab apum mellificatione, regimine eorum, statu Monarchico & immensis laboribus; tum formicarum industria, vigilantia prudentiq; œconomia; tum animalium, quæ jam pinguiscent, indeole & tripudiis. Ibi Equus per prata discurrit, hic Bos cornibus superbens inter arbusta graditur; istie pipiunt pullorum agmina, alibi in aëre varios meandros.

PIRE

pingunt insectorum greges; ibi per campos gramina prosternit diligens agricola, hic herbarum frägmina in culmos colligit laboriosa Nympha, alibi distentam vaccam mulget incurvata anus: sed Solis post occasum, quiescent à laboribus omnia viventia, exceptis noctivagis.

Mox descriptionem AUTUMNI annectere potes 1. ab ingressu Solis in Libram, quo pacto jam diem noctemque dividat in æquales partes; 2. à fructuum copia, quibus pensatur totius anni labor; Hic omnis generis frumenta colligit diligens Agricola, ibi excutiuntur poma pyra, nuces &c. alibi ancillarum grex olera comportat, rapas lavat; aromata in fasciculos collecta appendit de trabibus; 3. à venationis jucunditate, diligentia sagittariorum, sagacitate canum, astutia, cursu, alacritate in invadenda prædâ; hic Ursus prosternitur, ibi Leo conficitur, aper dilaceratur, alibi pellita animalcula glandibus icta cadunt de ramis, istic eburnices gregatim capiuntur, Perdices

laqueis implicantur, aviculae ceteræ vi-
scœ adhaerent. 4. à piscationis fructu. 5.
Nunc vina corda latifacit, calidiorum
haustum temperat cerevisia, nunc labo-
rum fructum experitur bilaris agricola;
sed in aëre furit ventorum rabies, orna-
tum depopulatur arborum, exundationes
Oceani causatur, mirasq; inducit Mundo
confusiones.

Tandem descriptio Hymnis subjunga-
tur. 1. Jam Solare corpus sidus Capricor-
ni visitat, iuistratq; signa australia, brevi-
aque diei, duplicatis noctium spatiis, pensat.
2. Jam glacialia marmora æquora tegunt,
montes cooperiunt nives, flumina con-
stringit rigor Aquilonis, eampli squalent,
horti, lugent ceciditq; undiquaq; herba-
rum venustas. 3. nunc intra stabulabulant
oves, rugiunt tauri, quiescunt armenta,
in sylvis cubat ursus, ululet lupus, gan-
nie vulpes, clangit Aquila, crocitat cor-
vus, babat upupa, reliquæ aves, relicta æ-
stivalilætitia, gemebundo pipitu mutatio-
nem temporum deplorant. Jam silent a-
pes, quieti indulgent laboriosæ formicæ,

muspiam funambulo araneus tela expli-
cat. 4. Jam cadunt nimbi, ruunt gran-
dines, glomerantur nives, Cimmeriae tene-
brae universam caundi gratiam turbant. 5.
Jam senes ad focum se calefaciunt, impigri
juvenes negotia curant, juvenculæ filiæ
trahunt, pusiones in cunis murmurant,
compulsi à frigoris vehementia.

Plinius Major, Ulysses, Columel-
la, Petavius, Ægidius von der Mn-
le in sua oblatione vitæ rusticæ,
cum Dialogi Pontani & Masseniide-
licatissimi versus, qui in palæstra
ligata inveniuntur, non vulgarem
suppeditant amplificationum copi-
am, circa hanc materiam.

Schema Epistolæ Dedicatoriæ hoc
erit:

Exordium ab illustrissimi viri, cui hoc
opus inscribitur, favore in literas & lite-
ratos, præsertim erga se ducatur.

Propositio interiora operis breviter ad-
umbret, sive Theologicum, Jurid. Med. Phis.
vel Historicum fuerit.

Narratio commendationem continebit
ab utili & necessario.

Conclusio brevis erit & pathetica.

Schema Consolatoriæ variat qui-
dem in deductione; manet tamen
hæc ossatura.

Exord: hic magnitudinem doloris
depinges, quem ex eo acceperis, quod a-
mici tui suavissima conjunx fata sua im-
pleverit.

Propositio ipsam pertinet consola-
tionem.

Confirmatio 1. ab inevitabili mortis
imperio, 2. à lege communi mortalium, 3.
à Christianorum patria, non in terris, sed
in cœlo querenda. 4. à calamitatibus
mundanis. 5. à piorum Exemplis, qui in
confimili casu solatia admisere. 6. ab
Etnicorum constantia.

Conclusio erit brevis & pathetica.

Tandem in laudanda Eloquentia
sic te exercebis.

Exordium ducatur à dignitate sermonis,
quæ superat gloriam cœlestium corporum

&c

& omnia terrarum magnalia, idq; ob animi vim & præstantiam rationis, quæ ambo se explicant cordato Orationis Eloquio.

Propositio: itaq; cum Eloquentia sit ea facultas, quæ rerum omnium cognitionem commodè, copiosè ornatèq; in publico cum Imperiorum usum explicet, solam esse quæ omne Elogium meretur.

Confirmatio 1. ab Eloquentiæ Divinitate. Sola enim hæc societas fundat, connectit, conservat; Divina sacra, pariter ac humana munera, regit & exponit. 2. ab utilitate, qua se diffundit in omnia publicarum rerum membra, in Ecclesiam, in forum, in universam Politiam. 3. ab Eminentia; hæc prudentissimos Rectores populorum facit, hæc viros doctos ornat eosq; ad honores evexit, hæc, in munilibus legatorum, utramq; paginam facit. 4. ab Exemplo. Sic Demosthenes, Phaleræus, Cicero, Potamon, non ob imagines summas majorum, sed dicendi scribendiq; libertatem, ad gerendos fasces urbium vocati. Sic Romanorum Flaminii, Varrones, Hortensi & principem occuparunt in Rep. locum, & bello incliti, & ob dicendi

laudem sunt hodieq; celebres. Sic Pau-
lus, Bernhardus, Lactantius, Basilius, Chry-
sostomus, Lutherus, concionum gravitate
& vehementia, Diaboli regnum prostra-
bant salutemq; procurabant animarum. 5.
à p[ro]p[ter]e & efficacia, qua irata pectora fedat,
à timore ad spem, à desperatione ad sa-
lutem, à fævitia ad clementiam, à vitiis
ad virtutum exercitia vocat, inflammat,
deducit.

Confutatio illorum blasphemias, qui
Eloquentiae Majestatem lacerant, ob illo-
rum errores, qui pestilenti lingua exitia-
Regnorum quæsiverunt, famam bonorum
macularunt, dissolutam vitam introduxe-
runt, modestè diluet.

Epilogus 1. repetet haec tenus dicta acu-
tè & breviter. 2. pro tam inestimabilido-
no aget gratias Deo immortali. 3. Pathet-
ica admonitione juventutem hortetur ad
excolenda studia *Eloquentie*

§. 3. Quando etas te vocat ad eligen-
dum certum vite genus, jamq; intel-
ligis naturam prono cursu studia civi-
bia amare; amputanda tibi est splen-
dens

dens illa & juvenilis luxurias, omnesque conatus referendi eò, ut possis Deo, Regno, Regi inservire, canticè & prudenter.

Si judicio polles, lectione & discursu vales, rerumq; habitudinem quodammodo intelligis; exerce Te in Musæo Tuo in hisce vel consimilibus argumentis meditandis ac elaborandis. Ablegare licebit Epistolam ad Regem Hispaniarum, qua, tanquam Legatus Regis Angliæ, filiam Monarchæ, Imperatori tuo, in matrimonium petes.

Exordium desumi potest à salute imperiorum & gentium securitate, quæ roboratur & alicut matrimonii Principum.

Proposito: hoc ponderasse Regem Angliæ, ideoq; mature ad nuptias adjecisse animum; inter tot Monarcharum filias, Principis Hispaniæ gnacam, ubi unice placere.

Confirmatio 1. propter indissolubile horum regnum fœdus. 2. propter vetustam ucriusque sanguinis gloriam. 3. propter amic-

amicitiæ fœderis unitatem. 4. propter Principalis hujus Matrimonii æternitatem & futuram securitatem populorum.

Conclusio sperabit Fortunatum even-tum & ambobus imperiis sinceram Majestatem, valida pignora, & ex tam chara matre patriæ, munimentum Anglorum.

Scribe literas ad Regem Sve-ciae nomine Cæfaris, pro obtainendo perpetuo fœdere.

Exord: desumatur à jure gentium, non enim homo tantum favore tenetur homini ex lege nature, verum etiam imperia ipsa, magna illa corpora, presidi-um inter se invicem firmare, & fœderum pactis suam Majestatem communire debet.

Proposit: Cesarem tale fœdus jam ini-re desiderare cum Corona Svecie, propter nobilissime gentis constantiam, fortitudinem, fidem.

Confirm: à cognatione odii in eosdem hostes, puta perfidum Gallum & Portam Ottomannicam. 2. præsidia utriusq; imperii fore validiora. 3. Exempla Majo-

rum alleganda. 4. Magnitudo bellorum & pacis suavitatis & terror etiam in hostes explicande. 5. incommoda ex fœdere neglecto. 6. fœderis conditiones notanda, fides vera non suspecta, auxiliii, commerciorum gloria &c.

Conclusio principatum coeuntium imaginem describet, tum jubileum confœderatarum gentium.

Fiat Hortatoria ad Regem Angliae, nomine Parlamenti, ne leges & Religionis sacra incipiat violare.

Exordium monstrabit salutem Imperiorum fundari super Religionem & justitiam, subductis hisce fundamentis corruet gloria Regnorum.

Propositio male ergo facere Regem quod contra Juramentum suum hæc incipiat in tam antiquo imperio violare.

Confirmatio à confusione quæ oboritur si Religio & jura mutantur, tam Magnatum quam vulgi, unde ci-

civile bellum de facili exardescere potest. 2. ab impossibili, quia periculo omnibus Regibus fuerat illa novitas; 3. ab inutili, si enim comparatio instituatur inter Anglicam Religionem & Pontificiam, hæc illâ est longè præstantior.

Conclusio hortabitur Regem talia consilia à pectore eradicare, Innumquam enim consentientem habebit Angliam, sed potius repugnantem.

Si ad mandatum Regium excipere debes advenientem Principem, formata domi oratione, ad istum dumtum potes compellare.

Exordium: diu optasse Regem videre & colloqui cum tam exoptato hospite, tam sapiente & cordato principe.

Propositio: non egrè ferat, si primus nomine Regis illum salutet, mox & ipsum adfuturum.

Con-

Confirmatio: est hic velut imos aula-
rum. 1. dicet deinde Regem peregrè detine-
ri ob varia belli & pacis negotia; 2. ex Di-
vina ejus imagine se hoc jam persentisce-
re illum nequaquam in deteriorem partem
hoc officii genus interpretaturum. 3. De ce-
tero pro incomparabili beneficio, quod hoc
regnum visitare voluerit, aperiri & pate-
re ipse non portus & arces, sed animos, fa-
dem, constantiam Gotborum.

Conclusio vota complectetur pro inco-
lumentate Principis, pro salute ejus princi-
patus, pro gloria civium.

Rursus adire Reges ista suppli-
catoria licebit.

Exordium ducatur à modestia & de-
missa gratiarum actione istius beneficii,
quod ad contemplandum Regis sereniss.
vultum, ad contactum dextræ, ad allo-
quendi audaciam admissus sit.

Propositio, itaq: cum clementiam ejus
deprædicet publica fama & judicia omni-
um subditorum, audere se modestè acces-
dere & personam suam reverenter com-
mendare.

Cont.

Confirmatio jam literis & peregrinationibus se per annos benè multos ditas-
se animum suum, deinde per aliquod tem-
pus militiam & prælia visitasse, itaq; va-
riis exantlatis laboribus petere ad rerum
aliqua ministeria admoverti; nam semper
ubi propositam fuisse metam, Reip. pro-
deesse.

Conclusio reppromittet se spiritum pro
Deo, Rege, Patria, ubiq; paratum habe-
re effundere.

Mox ipsi gratias agere ob mu-
neris in Te collati dignitatem.

Exordium. Imperatoris prolixia benefi-
cia enumerabit, quibus per tot publico-
rum munerum gradus tractus, cumula-
tusq; fueris, ob que si unquam ante, certe
nunc te in gratias & gratulationes sur-
gere.

Confirmatio itaq; tot Tuis laboribus
discriminibusq; quoniam tanta gloria ac-
cesserit, gratias agere.

Confirmatio docet hoc honoris fasti-
gium Tibi contigisse à Regia Clementia sola,
non

non spe, non merito, non pretio. 2. Te de conscientia securum hunc honorem nequam affectasse. 3. muneris onera describes, moxq; optes ut publice omnium expectationi satisfacere possis, modestia, cura, vigilancia.

Conclusio: rogabis principem, illam benignitatis constantiam servare: te conservata paratum esse nocte dieq; pro ejus incolumente excubiae agere.

Gratuletur Rex Poloniae, Regi Sveciae natum Regni hæredem.

Exordium inter tot Regum & Regina-
rum, jubila, tot populorum acroamata tot
urbium plausus, suam quoq; latitudinem &
gaudia & vota declarat Rex Poloniae.

Propositio: præsertim quod hoc tempo-
re Regalem thorum fecerit fœcundum De-
us maximus prole mascula.

Confirmatio: sic numen eternum vice-
rios auget suos; sic Regum cunctulatur glo-
ria; sic populorum spes & salus amplifica-
Con-

tur; sic retunditur malitia illorum, qui raro se continent in gradibus secundis, dum non sunt, vel eliguntur, sed nascuntur Reges.

Conclusio optabit ut hoc nobile pignus, hic Regius infans, succrescat in Dei bonorem, tutelam Regni, Parentum gaudia & tot gentium expectationem salutarem.

Plures dispositiones argumentorum politicorum qui desiderat, consulere potest Boxhornii ideas Orationum; cum quibus conjunge ea, quæ POMAY in Candidato & Johannes KWIATKIEWITZ in sua Iiadâ Civili, sive Phœnice Rhetorum non indoctè collegerunt; ad quorum latu[m] mox jungendi seculorum panegyristæ, Plinius, Mæmertinus, Pacatus, & consimiles: at ArgenisBarclaii, supremum locum tenebit.

¶. 4. Si ad altissimam Divinarum rerum meditationem & curam Religiosis Te sentis interiori instinctu vocatum; tunc prospicere debes, quid postulant muneris auctoritas, gravitas, pericula.

Auctoritatem habent digni emunus vel emendicant indigni. Gravitatem & amplitudinem muneris non omnes ex æquo capiunt. de periculis valde nibil sunt solliciti illi, quos avaritia & vanitas occæcarit. Quotiens lego Theologorum Disputationes de casibus conscientiae, totiens rationes eorum evidentissimas veneror; quomodo omnia delicta coram tremendo immortalis judicis tribunalii judicabuntur. sane vero sanctissimum est consilium, nisi illud hoc imperfectionis haberet, quod privatorum conscientiam tangat, non autem eorum, qui Regna & Provincias fœdant, Religionem vastant, indoctissimos

simos promovent, & Regalia ade-
 oque Divina jura extirpant; Heu
 miseram conditionem corporum!
 quando capita ægrotant, & felicite-
 meritate luxuriant. Ut autem sci-
 at juventus, qui libri ad exercitia
 Theologicarum Epistolarum effor-
 manda, sunt necessarii; evolvant
 Historiam Ecclesiasticam, ut con-
 troversias & Concilia Religionis in-
 telligant; Sleidani, & Thuani Com-
 mentarios pari fide cognoscant.
 Lutheri, Philippi Melanctonis, E-
 rasmi, Ludovici Vivis, Martini
 Chemnitii Epistolicae lucubrationes
 multum quoque juvant hoc negoti-
 um; nec contemnendi labores Biden-
 bakii, qui ad mentem veterum castè
 defunctus est suo officio. Ex recen-
 tioribus omne punctum impleve-
 runt, Hülsemannus, Carpzovius in
 Hodegetico, & Ericus Benzelius,
 cuius M:SS: vidi. Hi quidem auctores,
acta

acta Ecclesiæ docent, & quomodo
formandæ sunt conciones, monstrāt.
Sed ad illas ideas; quis non Episto-
las Theologicas quoquj concinnare
potest? Dummodo intelligit fun-
damentum fidei, Historiam & sta-
tum temporum: id enim postulat
earum rerum meditatio, ut sis in
profundis illis discursibus solidus,
robustus, excellens; non vagus, in-
eptus; non externo apparatu venu-
stus. Qua de re uberior agam in
libello de perfecto Oratore Ecclesiastico,
Aulico, Academico.

§. 5. In omnibus Epistolarum generibus
æquè ac in orationibus, disciplinis ac
discursibus ceteris, omnino babenda
est ratio ossaturæ seu Philosophiae,
tum ligamentorum, denique amplifica-
tionis.

Brevi similitudine hoc præce-
ptum isto modo declaramus. Quod
in corpore humano est Scheleton
K 2

ossi-

ossium, crani, costarum, spinæ dor-
 si, brachiorum & pedum. Id in
 quolibet scripto, si modo cum judicio
 colligitur, est ipsius SAPIENTIÆ ba-
 sis. In *Theologico argumento*, aliquis fi-
 dei articulus. In *Juridico themate*,
 Justitiæ indoles, legum sanctitas, a-
 deoq; quidquid, personas, res & a-
 ctiones concernit. In *medendi arte
 cause*, signa, curatura morborum,
 sectionum Anatomicarum industria,
 tum Chimiæ & Botanices peritia.
 In *universa Philosophia*, in *Oratoria*,
Poësi & *Historia*, &c. objecti cuius-
 cunq; fundamentalis cognitio & tra-
 statio curiosissima. Porrò quod in
 corpore humano sunt nervi, ten-
 dines, ligamenta; id in Epistola, æ-
 què ac in singulis Doctrinarum ma-
 teriis, sunt *Antecedentis*, *Connexionis*
 & *Consequentis notitia*: Hæc enim
 tria, membra connectunt, periodos
 diducunt, vim & motum dant lite-

ris.

ris: At vero, quod in corpore nostro sunt carnes, sanguinis tubi, muscularum varietas, medullarum balsama, Hepatis calor, cordis vigor, lienis, renum, vesicæ, tot viscerum officia. Id in Epistola est amplificatio, nunc prolixior, per causas, Effecta, Adjuncta, Contraria, Comparata, cum amœno auctoriatum atq; Exemplorum ornatu. Proinde in hac palæstra sincerè Discipulos suos examinabunt illi, à quorum prudenti ore, lac, nectar & semina scientiarum fugunt bauriuntq; Discipuli.

CAP. OCTAVUM.

DE VIRTUTIBUS & VITIS EPISTOLARUM.

§. I. *Virtus & vitium sunt lapides lydi, quorum beneficio, probam Epistole monetam ab impuriori dignoscimus. Itaq; virtutum prima nobis esse potest Perspicuitas.*

Est sanè *evidentia*, totius eruditio-
nis vita & anima ; sectatur faci-
litatem conjunctam cum alaci sim-
plicitate, ut singula, Solis instar, si-
ne difficultate & perplexis amba-
gibus, legentium oculis mentibusq;
compareant. Nec quidquam ma-
gis ipsi adversatur, quam *obscuritas*,
quocunq; demum titulo, sive per-
allegoriarum laqueos, vel *amphiba-
lica*, ut ita dicam, *locutionum mon-
stra*, aut *trajectionem inordinatam ver-
borum*, tum *affectati Laconismi ridi-
culam ostentationem*, deniq; alium con-
similium nugarum apparatus, irrepat.
Videmus corporis nostri fabricam
tam aptis & divinis membrorum
vinculis coagmentatam ; videmus
quasdam partes in fastigio positas,
quasdam in meditullium insertas,
quasdam cute & musculis obductas,
omnes suis claustris sic communi-
tas, ut totus hic æternitatis Typis
appa-

appareat elegans, svavis, dulcissimus. Ita comparatum cum qualibet oratione, etiam Epistolari, erit. Sit *compositio germana*, *nexus pulcherissimi*, *concentus harmonicus*, *antecedentium & consequentium catene ordinatisimae*, ut posteriora à prioribus fluere & pendere videantur. Intellexit hoc pia mens Doctoris gentium, dum Thymotheum suum, & cum eo omnes cœlestis verbi praecones hortatur, esse ὁγροτεμῆτας τὸν λόγον τῆς κληρονομίας, ut desperato descriptoq; in sua membra Dei verbo, divisè & distinctè omnia examinente, evolutamq; Spiritus Sancti membrum, bono ordine, non confusè, non turbatè populis proponant. Sameò vero dum singula revocantur in suum locum, accuratoq; disponuntur ordine; nunquam ruitur ingenium, nunquam confunditur judicium, nunquam difficit memoria. Perspicuitatis pedissequæ sunt, puritas, quæ sincere jubet verba esse.

aurea, nitida, eleæta; incq̄ omnium
populorum linguis usitatissima, tum
compositio concordans, cum arte & u-
su rectè casteq̄ loquentium; deniq;
ut *examinatrix suada*, singulos nexus
& partium minima curiosè exami-
net. Quemadmodum Theologi
gravissimi non descendunt in certa-
mina cum latè patente hæretico-
rum colluvie, nisi prius centrum
concertationum tamquam immobi-
le principium fixerint; nimirum ar-
ticulum de JUSTIFICATIONE; circa
quem decircinant vallum æternita-
tis, AUCTORITATEM SACRÆ SCRIP-
TURÆ, quæ sola evolvit, DEI PLA-
CITA, CHRISTI OFFICIA, S. SANCTI
gratiosas consolationes: tum vero
ex muro illo ÆTHEREO fortiter pu-
gnant; telis plus quam Herculeis, pla-
nè & consimili processu, Debet E-
PISTOLARUM SCRIPTOR, materiae, de
quâ scribit, fundamentum intellige-
re

re; idq; haurire ex *Theologorum, Jurisconsultorum, Medicorum, Philosophorum, Oratorum, Poëtarum, Historicorum placitis.* Mox infinitam illam rerum objectarum multitudinem, beneficio judicii discriminare, ne aliqua oboriatur confusio, singulisq; ad suum locum revocatis, aptè, clarè, perspicuè omnia, prout postulat cùjusq; materiæ dignitas, *stylo Epistolari* efferre.

§. 2. *Ad latus Perspicuitatis jungimus virtutum alteram VERITATEM, quæ sincerè cavit, ne mendaciorum nubes, tam prætio rei, obscuret splendorem.*

Ut à Deo omne bonum; sic Numinis instinctu, veritatem quovis tempore loqvuntur, quærunt, sestanturq; cordati homines. Hinc potissimum illis habemus fidem, qui & præclara sciunt, & salutaria docent, & juxta honestatis ac utilis publici regulas vivunt; denique in

scriptis suis, non inanem gloriam adfendant, sed veritatis defensionem suscipiunt. Hæc quippe est illa Dea, quæ in maximis malis servat & tueretur generositatem animi, sibi bene consciæ, omneq; fel mundi vertit in ambrosiam æternitatis. Aliis placet *corpus formosum, pingue factum oleo, piperatum saccaro, vino delibutum*: sed Candidato veritatis sufficit, una pulcherrima pulchritudinum VERITAS, tosta sole, vexata laboribus, sincerâ sapientiâ & prudenti scientia rerum, ambulans in publicum. Quotiens nobis occurruunt impuri homines, mendaciis onusti, insipidi, stolidi; totiens pavent viscera, horret animus, trepidant membra, tamquam repente viro larvato monströ. At vero, quando veritatis Heros, sapiens, prudens, sciens, nobiscum colloquia miscet; tum vero extempore, tanquam ad ortum benignissi-

gnissimi sideris, lætatur animus, exultant affectus, excitatur interior mentium alacritas. Specula non reddunt imaginem, nisi vitro substernas stannum, aut aliquid solidi, quod imaginem non sinet perflue-re: Eodem modo in pectoribus altis, & vera virtute confirmatis, relucet splendor veri, veritatis appetitus, veritatis candor, veritatis gloria dignitas. Sudent alii in conquirendis nummis & lapillis, quæ levis casus cito aufert; Germani eruditi, & in his Epistolarum Scriptores, lecten-tur VERITATEM, Dei Filiam, Angelorum sociam, Magnarum mentium pabulum, cuius forma Sacro Sancta, puritas etherea, possessio inestimabilis, consolatio divinissima.

§. 3. Tertia virtus consistit in brevitate moderata: quod tamen preceptum, cum granosalis accipiendum est.

Quamvis brevitatem inter orna-
menta

menta Epistolaria pono: nemo tam
men existimabit me adeo simpli-
cem fore, ut cujuscunq; argumenti
indolem, intra istum gyrum velim
coaretari. Ponderandæ semper
sunt, aptitudo materiæ, temporis
ratio, & personarum qualitas. Do-
ctissimorum virorum Epistole, Erasmi ad
Franciscum i. Regem Gallie; Lutheri ad
Pontificem Romanum, & Principes Ger-
maniae; Thomæ Mori ad Dorpium, Sene-
ca per plurime, Lipsi & Gvadara, tum
Hippocratis ad Damagetum; & consi-
milium eruditorum virorum, justo
videri possunt prolixiores. At ve-
ro dum examinamus Argumenti
pondus, deductionis artificium, re-
rum densitatem & vim, optaremus
eas esse adhuc prolixiores. Aliud
q; flagitat materia grandis, aliud
levior & jocosa, aliud mediocris, aliud
plane familiaris. Ad occupatos pari-
tèr cum scribimus, fugienda proli-

xitae,

xitas, ne pereat intentionis vigor,
turbetur meditationis ardor, inter-
reatq; penitus literarum gratia.

§. 4. *Seqvuntur nunc vitia Epistolarum,*
& quibus primum locum occupat mon-
strofite.

Sunt quidam homines, qui intu-
mescunt ob qualemcumq; nominis
celebritatem; quam si non habeant,
saltem habere videntur. Nam, cum
nulli desunt laudatores; & dum ad-
ulatores absunt, suos deformes fœ-
tus promulgant ipsi. At quos fœ-
tus? quos Physici appellant *mon-*
stra, quatvor brachiis, totidem pe-
dibus, immaniq; capite prodeuntia
in lucem. Tales sunt *illa Epistole*,
quarum exordium est excusatori-
um, robur nullum, sanguis albens
& putridus, digressiones alienæ &
penitus ineptæ, amplificationes tam
stolidæ, ut ad deridendas eas, ne
centum quidem sufficient Democri-
ti.

ti. Classem salium exornant jucundo e-
logio, Epistole obscurorum virorum; ubi
nonnulli indocti magistelli introducun-
tur, bacchantes in Theologiam Lutheri;
Philippi & Capnionis doctrinam; tum
eloquentiam Erasmi Rhoterodami.

§. 5. Alterum vitium est latinitas affe-
cta, & non adeò placidus verborum
contextus.

Illa, sine sensu & judicio ex pu-
tridis chartis colligit verba ranci-
da, impropria, peregrina, obso-
leta, à Romani oris castimonia pau-
lò remotiora. Hæc singula con-
jungit horridè & spinosè, quasi is,
qui ex luto & glarea, palatum o-
lim extruxit: placet, animi gratia,
pulchros istos jocos adponere, ut
discat candida juventus, paleam à
tritico discernere.

*Horribilem salutem & miserabilem bu-
militatem contra Majoritatem vestram,
Reverendissime, mirabilissime, nobilissimeq;
Domine Pater.*

Quo-

Qvoniā si haberem nūmmos & substan-
 tiā magnā, tunc possem fieri unū bonum
 suppositum. Credatis firmiter, quod pos-
 sem fieri unum subjectum scientificum, quia
 sum multum vocalis, & multum discipli-
 natus. Sed quia non habeo, oves, boves,
 & peccora Campi, sed sum sordidescens,
 non tamen indoctus, nam scio grassari in
 omni scibili, & sum mirabiliter fundatus.
 Ergo rogo vos amicabiliter, velitis me ju-
 rare; quia estis vir authorizatus, & potestis
 Practicare bene, quando aliquis dat vobis
 pecuniam, & habetis magnam dulcedinem
 in compositionibus vestris, quare debetis
 laudare Mariam & Sanctos, qui orant pro
 vobis. Non debetis me habere pro mo-
 lestia, quod propino vestrae Dominationi
 irreverentialiter unam novam bonitatem.
 Ego bene valeo, & cum Aristoteles dicit
 in prædicamentis de singulis dubitare non
 est inutile. Est hic unus omnia turbans
 Græcus, qui resumit Grammaticam Urba-
 ni, & quando scribit Græcum, tunc sem-
 per ponit titellos superius, qua re ego dixi
 nuper, Magistralissimus, hic practicavit
 Grammaticam Græcam, & est vir suffici-
 ens

ens, & nūnquam scribit titellos, sicut ille;
 & ego credo, quod æque bene intelligit fa-
 cia sua sicut ille, & adhuc potest corri-
 ge istum. Rogo ergo velitis me in isto
 Græco juvare, quia Mardardus noster so-
 cius vos multum laudat, quia Lutherum
 & Erasmum appellatis vocem & præterea
 nihil: idq; rectissime, Nostri Domini sunt
 magni homines, & ambulant graviter &
 habent cataputica & boant multum. Sed
 illi nos rident, quia non possunt unum
 vocabulum arguere pro & contra, & con-
 cludere in barbara. Notificate ad me, an
 debeam ponere titellos supra, an non? tunc
 volo illum Græcum realiter vexare, estis
 enim unus homo bonissimus. Ergo pe-
 ro vos affectualiter, quatenus significare
 velitis mihi, quomodo stat res vestra, cum
 vestris Antagonistis? Hogstrat noster di-
 sputabat prædicabiliter cum Petro Bein-
 bo, & ille arguebat pro & contra, & Hog-
 strat iratus surrexit ex mensa, & allegavit
 Evangelium, & dixit voce magna. *Sama-*
ritanus es, & Diabolum habes: & ego vo-
 ciferavi, Capias hoc, & fui valde gaudi-
 osus, quod ita turabat eos ejus, &c. feci

magnam crucem pro me , quando talia
 audio, & laudavi Hogstrat, quod tam hæc-
 ceitaliter se expedivit, quamvis aliquando
 mortaliter peccat, & amat mulieres quan-
 do nemo videt, & lavat se in aqua sacri-
 ficata & ambulat sine ocreis, & facit au-
 ricularem Confessionem. Sed debet ille
 cum vobis habere unam bonam lætitiam
 quia Physici dicunt quod sanum est, quan-
 do sumus lætæ mentis & tenes purgamus
 sumus homines & non Angelus, & omnis
 homo peccat, quia non debet solus dor-
 mire juxta illud: si dormiverunt duomu-
 tuo; unus quomodo calefit. Ego mitto
 nunc vobis unum librum Theologica-
 lem contra Lutherum. Ego rogo quod
 velitis facere imprimere eum, quia schan-
 dalizat Nasutum illum Lutherum & Phi-
 lippum qui perdiscant homines & defendit
 Caietanum & Ecchium, & est liber robora-
 tus sigillo universitatis Parisiensis, & ci-
 citat Lutherum ad Papam ubi damnari de-
 bet ut hæreticus, & mox comburi in igne.
 Est liber doctissimus & superdisputat o-
 mnes malos & est lux mundi & clamat
 contra peccata: Itaque postquam fecerit-

L

tis

tis imprimi, mittite mihi veraciter unum exemplar quod humiliter & devotariè rogo, Plura non scribo antequam scribitis, & dum scribitis aliis sicut ego scribo ad vos, & ad me scribite. Non estis inimicus meus, nec debetis me superdare, ergo debetis scribere, & si non habetis quod scribitis, debetis tamen scribere, quare non scribitis. Et sicut nunc scripsoram ad vestram Reverentiam, ita scribite ad me, ut intelligam vestram Reverentiam voluere esse & posse scribere: prædicamentaliter, rogo velitis mihi scribere, tunc ego volo vobis scribere quia libentissime scribo, & volo me exercere in scribendo quia sum Candidatus Eloquentiæ & fortissimus Theologiæ Pugil. Valete ex Daventria ultima Cal: Maii, A. 1.5.17.

§. 6. Tertium epistolarum vitium est invectiva paulo audacior, & forte plus quam puerilis.

Stylum ingenium cuiuscumque, animum ac mores repræsentare, unanimis doctorum confessio est.

Hinc

Hinc Fabius dixit, profert mores plerumq; oratio, & animi secreta detegit. Scilicet ingenii humani vis & intelligentiae notio, non tam ex habitu oculorum & specie oris exter-
no; quam ex sermone cognoscitur, qui certissimum est minimeq; mendax sensationis internae speculum; intellexit hæc probè DION, cum ingenium Tiberii describeret; TACITUS pariter; tum erudita illa virorum quadriga, CLARAMONTIUS, NEUHUSIUS, ÆSCATIUS, BARCLAIUS, in suis ingeniorum scrutiniis. Profecto indolem ingenii sequitur natura aetus, quæ non aliundè, quam ex suis originibus judicanda est. Sativa ludere satyra in vitia, quorum ingens copia; in pravam consuetudinem, cuius pestis latissime serpit; in mores obscenos; in impudentiam indoctorum, in ridiculas & cum omni honesto ac utili publico

La

pugnan-

pugnantes dispositiones, prudenter intentio est & manebit. Semper hic ait sapientissimus ille, *eruditis mos fuit, quidquid dolet aut delectat, chartis, seu fidis sodalibus committere, in harum sinum, omnes pectoris aestus effundere.* Viri Gravissimi, HIERONYMUS & BERNHARDUS aliquoties à talibus non temperant. LUTHERUS propter zelum pietatis & monumenta egregia, ad orbis terrarum famam dudum consecratus, grandi satyra ludit in Papam; quam sapientes ejus temporis, notante Sleidano, vehementer commendabant. Erasmi colloquia; ejus cogitationes de lingua; Encomium morias, querelam de Pace undiq; ejectam. Heinsii umbram asini; Mori utopiam: Agrippa scientiarum vanitatem; Petronii, & Barclaii Satyrica, consimilacj; scripta, nemo aliis, quam qui stolidè errat, hactenus vituperavit. Adeo laute, adeo

adeo festivè, homines à vitiis trahunt in virtutis viam, eorum scuriles actiones generatim taxant, ut admoniti citò resipiscant. Hodie v. si quis honesta defendit, vera propugnat, erroneam vivendi rationem levi brachio castigat; mox inhorrescunt fauciæ conscientiæ; neque considerant illud nectar, sic propinatum omnibus, ut nemini sit infusum, nisi illis, qui se nuda opinione inebriant. Scilicet furor vulgarium ingeniorum, suæ malitiæ, suæ inscitiæ præclarè concius, pueriliter aliquid tentat, ne nihil egisse videatur, cum faciem seculi & scopum ac intentionem bonam, per somnium ne quidam intelligat. Characteres talium depingit graphicè, virorum doctissimi, Hieremiæ Drexelii **ORBIS PHAETHON**, sive pulcherrimæ meditationis de universis Lingvæ vitiis.

§. 7. Quarum vitium est placida ostentatio nove inventionis.

Memorant Plinius & Aldrovādus, avium stupidissimam *Struthionem*, externo niſu, minari sublimē volatum; cum tamen vix se valeat à solo attollere; deest fortè plumarum apparatus, nec magnitudini corporis, respondent alarum remigia. Eiusdem indolis sunt nonnulli egregiè indocti buccinatores; qui dum Epistolis suis, publicam famæ censuram festinant aucupari; dum alios præ se contemnunt; dum candidos arrodunt; dum eorum labores festivis dicteriis conspurcant. Dum se solos admirantur; se ut idola Chinensia volunt adorari, à verè eruditis, qui doctorum placita reetè intelligunt; qui optimas vitæ regulas, ad usum vitæ conformant; qui prudentium sententias, ad salutis publicæ modulos exigunt; qui ex pro-

prominentibus auribus, facile lepo-
rem à Taxo, dignoscunt, risu ex-
æquo & commiseratione excipiun-
tur. scilicet nibil gloriosius inficitia; cum
scientia persuasione conjuncta.

§. 8. Discat proinde *Candida juventus*;
inter Epistolarum virtutes & vitia,
cautè discernere.

Illud ratio, hoc honestas magnopere
svadent: & ratio quidem, quamvis in an-
gusto capitis angulo habitet, perpetuoq;
pugnet cum IRA, quæ præcordia obsidet;
& concupiscentia, quæ ad pubem usq; lon-
gè lateq; imperitat; tamen si timore Nu-
minis, patientia, modestia, temperantia,
candore, & prudentia, se firmaverit; du-
bium est nullum, qvin de tot passionum
hostibus, aliquando victoriam obtineat:
honesti v. cura, omnes sanos homines, &c
cum primis literatos movere debet, ut
personam in hac lubrica scena cum di-
gnitate sustineant. Illud tunc fieri, quan-
do veritas in cogitationibus, in actioni-
bus virtus, in operibus candor, in scri-
ptis sincera eruditio lucent. Itaq; dum
manum

manum stylo admovebitis ô juvēnes ! unde
 interior vestra indoles, à sapientibus facile
 probatur ; Essugite Mendacium , fastum ,
 impuritatem , obscuritatem , & litigandi
 pruriginem . Stolidorum est proprium
 confingere Antagonistas , adversus quos ,
 acrius tremant , & ex qua æmulatione fa-
 mām augeant ; sperant n. futurum , ut
 quo nugacioribus nugis , chartas macu-
 laverint , à sui similibus h.e. superbis &
 indocilis probentur . At veri sapientes ,
 mox judicant ista Aspidum ova , quam-
 socius in suos autores , virus
 omne effundere .

SOLI DEO SIT IN TEMPORE ET
 ÆTERNITATE HONOR AC
 GLORIA .

